

畿輔通志卷一百三十二

略八十七 前事二 五代至明 國朝

五代

戊辰 晉主李存勗稱唐天祐五年 劉守文攻幽州劉守光求  
梁主朱晃開平二年

救於晉晉主遣兵助之守文兵至蘆臺軍今滄州境為守光所敗

又戰玉田今縣屬遵化州亦敗守文乃還

已巳 梁開平三年劉守文以重賂招契丹吐谷渾之眾合四萬屯

薊州守光逆戰於雞薊今薊州西為守文所敗守文單馬立於陣

前泣謂其眾曰勿殺吾弟守光將元行欽識之直前擒之滄

德兵皆潰守光囚之別室梃以藜棘乘勝進攻滄州滄州判

官呂充孫鶴推守文子延祚為帥乘城拒守

梁以劉守光為燕王

庚 晉稱唐天祐七年 劉守光克滄州殺其兄守文  
午 梁開平四年

梁主疑趙王鎔貳於晉且欲因鄴王羅紹威卒除移鎮定會  
燕王守光發兵屯涑水欲侵定州遣供奉官杜廷隱丁延徽  
監魏博兵三千分屯深冀聲言助趙守禦趙將石公立戍深  
州白鎔拒之鎔不從深冀民見魏博兵入奔走驚駭未幾廷  
隱等閉門盡殺趙戍兵乘城拒守鎔始命石公立攻之不克  
乃遣使求救於燕晉與義武節度使王處直共推晉王爲盟  
主合兵攻梁晉遣周德威將兵出井陘屯趙州鎔使者至幽  
州守光不爲出兵

梁王景仁等進軍柏鄉趙王鎔復告急於晉晉王自將由贊

皇 今縣屬 東下王處直遣將將兵五千以從至趙州與周德

威合進距柏鄉三十里遣周德威等以胡騎追梁營挑戰梁

兵不出復進距柏鄉五里營於野河

即槐河在今柏鄉縣西南

之北又遣

胡騎迫梁營馳射且詬之梁將韓勅等將步騎追擊德威帥

精騎千餘擊其兩端獲百餘人且戰且卻距野河而止梁兵

亦退晉王欲速戰用德威計拔營退保高邑

辛未 晉稱唐天祐八年 梁乾化元年

晉周德威與別將史建塘李嗣源將

精騎三千壓梁壘門而詬之王景仁韓勅怒悉眾而出德威

等轉戰至高邑南李存璋陳於野河之上梁軍競前奪橋晉

指揮使李建及力戰卻之自己至晡梁兵大潰晉兵夜至柏

鄉梁兵已去李嗣源等追奔至邢州河朔大震晉王收兵屯

### 趙州

晉王遣周德威史建塘趨澶

今開州地

魏張承業李存璋攻邢州

自以大軍繼之梁主遣別將徐仁溥將兵自西山夜入邢州

助王檀城守晉王至魏州攻之不克梁主以羅周翰年少且忌其舊將佐以李振爲天雄節度使命杜廷隱將兵千人衛之間道夜入魏州助周翰城守德威攻拔澶州等城劉守光聞梁兵敗欲以兵威離間鎮定二鎮諸將勸晉王先取守光然後專意南討會梁楊師厚引兵救邢魏晉王解圍去師厚留屯魏州周德威等亦解邢州圍晉王命德威以兵屯戍趙州

梁主命楊師厚將兵三萬屯邢州以攻趙

劉守光謀稱帝孫鶴諫守光斬之遂卽位國號燕改元應天受冊之日契丹陷平州燕人驚擾

梁主聞晉趙謀入寇力疾北巡思雪其恥旣而晉趙兵竟不出遂自魏縣南還



劉守光寇易定攻容城今縣屬正定府晉遣周德威救之

壬申晉稱唐天祐九年梁乾化二年晉周德威東出飛狐與趙將王德明

義武將程巖會於易水攻燕祁溝關即今岐溝店在涿州西南下之進克

涿州德威遂至幽州城下守光求救於梁梁主自將救之命

楊師厚等圍棗強今屬冀州賀德倫等圍薊縣師厚急攻棗強拔

其城屠之梁主引師厚兵與德倫合兵攻薊未及置營晉史

建塘李嗣肱各將三百騎效梁軍旗幟服色與樵芻者雜行

暮至營門縱火大譟弓矢亂發梁王以晉軍大至燒營夜遁

既而遣騎覘之曰晉軍實未來此乃史先鋒游騎爾梁主慙

憤病遂增劇

義昌節度使劉繼威年少淫虐淫於都指揮使張萬進家萬

進怒殺之自稱留後以周知裕為左都押牙遣使奉表於梁

亦遣使降於晉晉王命周德威安撫之知裕心不自安遂奔  
梁梁改義昌爲順化軍以萬進爲節度使

晉周德威遣裨將李存暉等攻瓦橋關其將吏及莫州刺史  
李嚴皆降

晉李嗣源攻瀛州刺史李敬降

晉周德威與燕師戰於龍頭岡

亦曰臥龍岡在今順天宛平縣西北擒其將單

廷珪

天雄節度使羅周翰幼弱楊師厚軍於魏州久欲圖之憚梁  
主威嚴不敢發至是師厚館於銅雀驛

在今元城縣界

朱友珪弑梁

主而自立遂引兵入牙城據位視事梁以師厚爲天雄節度  
使徙周翰鎮宣義

趙將王德明攻拔宗城楊師厚伏兵唐店

今薊州南擊破之

癸酉 晉稱唐天祐十年 周德威攻拔順州 今順天府順義縣界 又拔安

遠軍 今薊州界 薊州將成行言等降未幾復拔蘆臺軍

晉李存暉攻燕檀州刺史陳確以城降

晉將劉光璿克古北口 今密雲縣東北 燕居庸關使胡合圭等奔晉

燕劉守光命大將元行欽募山北兵以應契丹晉李嗣源分

兵徇山後八軍 今居庸關古北口地 皆下之進攻武州高行珪以城降

元行欽聞之引兵攻行珪行珪使其弟行周質於晉軍以求

救李嗣源引兵救之行欽解圍去嗣源與行周追至廣邊軍

今宣化府龍門縣界 凡八戰行欽力屈而降嗣源進攻儒州 在今延慶州界 拔

之

晉周德威進軍逼幽州南門劉守光致書請和德威不答守

光懼復遣人祈哀德威乃以聞於晉王別將劉光璿拔平州

執張在吉進攻營州刺史楊靖降

梁楊師厚與劉守奇大掠趙境師厚趨趙州守奇趨冀州會攻下博按之趙王告急於周德威德威遣騎將李紹衡會趙將王德明同拒梁軍

晉王遣張承業詣幽州與周德威議軍事劉守光遣使詣承業請以城降承業以其無信不許

晉五院軍使李信拔莫州擒燕將畢元福進拔瀛州

晉王與趙王鎔會於天長

燕王守光引兵夜出復取順州帥眾夜出將入檀州晉周德威自涿州引兵邀擊大破之守光以百餘騎逃歸幽州

盧龍巡屬皆入於晉守光求援於契丹契丹以其無信不救屢請降於晉晉亦不許晉王督諸軍攻燕城克之擒仁恭守

光帥妻子亡去將奔滄州爲人所擒送晉軍

甲 晉稱唐天祐十一年 晉王既克幽州乃謀伐梁會趙王  
戊 梁乾化四年

鎔及周德威攻邢州李嗣昭引兵會之梁楊師厚帥師救邢

州晉軍退諸鎮兵皆引歸

乙 晉稱唐天祐十二年 梁天雄節度使楊師厚卒梁生分  
亥 梁貞明元年

天雄六州爲兩鎮以賀德倫爲天雄節度使置昭德軍於相

州割澶衛二州隸之以張筠爲節度使分魏州將士府庫之

半入昭德恐魏人不服遣開封尹劉鄩屯南樂 今縣屬大名府 澶州

刺史王彥章屯金波亭 在今元城縣東 以脅魏魏兵不願分徙縱火

大掠圍金波亭彥章斬關而走亂兵入牙城劫德倫置樓上

效節軍校張彥自帥其黨拔白刃止剽掠梁主遣使撫慰魏

軍彥請復還三州不許因逼德倫以書求援於晉晉王得賀

德倫書疑魏人之詐按兵不進德倫遣判官司空頰犒軍密  
言彥凶狡請先除之張彥謁晉王王數其罪斬之德倫率將  
吏請晉王入府城慰勞旣入德倫上印節王固辭而後受之  
以李存進爲天雄都巡按使有訛言搖衆及強取人一錢已  
上者皆梟首磔尸於市旬日城中肅然

晉人夜襲瀘州陷之刺史王彥章在劉鄩營晉人獲其妻子  
待之甚厚遣兵使誘彥章彥章斬其使晉人盡滅其家

晉王勞軍於魏縣因帥百餘騎循河而上覘劉鄩營會天陰  
晦鄩伏兵五千於河曲鼓譟而出圍王數重王躍馬大呼所  
向披靡裨將夏魯奇等操短兵力戰自午至申乃得出亡其  
七騎會李存審救兵至乃得免賜魯奇姓名曰李紹奇

劉鄩以晉兵盡在魏州乃引兵屯宗城謀據臨清以絕晉糧

道周德威急追至南宮略鄠營而過鄠引兵趨貝州德威攻之不克既而鄠攻鎮定營爲晉將李存審所敗奔還

梁將王檀賀瓌攻澶州拔之執刺史李嚴梁以楊延直爲澶州刺史

貝州刺史張源德有卒三千每夕分出剽掠州民苦之請墜其城以安耕耘存審乃發八縣丁夫墜而圍之

丙 晉稱唐天祐十三年 梁劉鄩堅壁不出晉王乃令李存

子 審守營自勞軍於貝州鄩聞之與澶州刺史楊延直合兵襲魏州城中選壯士潛出擊之延直不爲備潰亂而走詰旦鄩與延直餘衆合李存審踵其後李嗣源以城中兵出戰晉王亦自貝州至與嗣源當其前鄩見之驚却晉王爲方陣於西北存審爲方陣於東南鄩爲圓陣於中四面受敵合戰良久

梁兵大敗郭突圍走步卒七萬殺溺殆盡

晉王自衛州進攻惠州

天祐三年改磁州為惠州

刺史靳紹走擒斬之以

惠州為磁州

晉拔洛州以魏州都巡檢使袁建豐為洛州刺史

晉王自將攻邢州保義

梁改昭義為保義軍統邢洛磁三州

節度使閻寶拒守

梁主遣張溫救之溫以其眾降晉寶亦舉城降晉王以李存

審為安國

今祁州南

節度使鎮邢州

契丹侵晉入蔚州

晉兵逼滄州滄州庫晉王徙李存審為橫海節度使鎮滄州

以李嗣源為安國節度使

晉人圍貝州刺史張源德欲降眾不從共殺源德嬰城固守

城中食盡乃請環甲執兵而降晉將許之其眾三千出降既



釋甲圍而殺之盡殫

丁晉稱唐天祐十四年梁貞明三年晉王弟存矩在新州驕惰不治倚

婢預政晉王使募山北勁兵及劉守光亡卒以助南討存矩自部送之以盧文進爲裨將行者皆憚遠役至祁溝關小校官彥璋因衆怨殺存矩擁文進還攻新州不克攻武州又不克遂奔契丹

盧文進亡奔契丹遂引契丹兵急攻新州刺史安金全棄城走晉周德威攻之旬日不克契丹主帥衆救之德威大敗奔歸

契丹乘勝進圍幽州周德威遣使告急晉王命嗣源先進軍於涑水李存審閻寶繼之會於易州嗣源與存審謀以虜騎利平原不若自山中潛行趨幽州遇虜則據險拒之遂踰大

房嶺而東嗣源與養子從珂爲前鋒每至谷口契丹輒邀之  
嗣源父子力戰得進至山口契丹以萬騎遮其前將士失色  
嗣源以百餘騎先進躍馬奮搥三入其陳斬契丹酋長一人  
後軍齊進契丹兵卻晉兵始得出將至幽州契丹列陳待之  
存審命步兵陳其後戒勿動先令羸兵曳柴然草而進煙塵  
蔽天契丹莫測其多少因鼓譟合戰存審乃趨後陳乘之契  
丹大敗嗣源等遂入幽州

戊寅

晉稱唐天祐十五年  
梁貞明四年

晉王謀大舉伐梁周德威將幽州

步騎三萬李存審將滄景步騎萬人李嗣源將邢洺步騎萬  
人王處直遣將將易定步騎萬人及麟勝雲蔚新武等州諸  
部落契丹室盡並谷渾皆以兵會之並河東魏博之兵大闔

於魏州

晉王攻濮陽拔之

已晉稱唐天祐十六年 晉李存審於德勝渡名在開州今州治北城也其

卯 梁貞明五年 南城宋爲瀘南北夾河築兩城而守之謂之夾寨

梁賀瓌攻德勝南城以竹竿聯艨艟十餘艘蒙以牛革設睥  
睨戰格橫於河流以斷晉救兵晉王自引兵救之不能進李  
建及使人操斧入艨艟斧其竹竿又以木鬯載薪沃油燃火  
於上流縱之隨以巨艦艨艟隨流而下梁兵焚溺殆半晉兵  
乃得渡瓌解圍走

梁兵至頓邱遇晉師而還

晉王如魏州發徒數萬廣德勝北城日與梁人爭互有勝負  
左射軍使石敬瑭戰於河壩梁人斷其馬甲劉知遠以所乘  
馬援之自乘斷甲馬徐行爲殿梁人疑有伏不敢迫俱得免

敬瑭以是親愛之

梁築壘貯糧於潘張

通鑑注引薛史云潘張村在河曲

晉王自將邀其餉者

俘獲而還梁人伏兵於要路圍之李紹榮單騎奮擊救之僅

免晉王復與王瓚戰於河南瓚先勝獲晉將石君立等既而

大敗乘小舟渡河走晉王乘勝遂拔濮陽

辛晉稱唐天祐十八年已梁龍德元年

趙王鎔驕於富貴多事遊嬉又好

左道煉丹藥求長生盛飾館於西山

在平山縣西南

每往遊之委政

於行軍司馬李藹宦者李弘規石希蒙會鎔自西山鶴營莊

在今平山縣西

將還府希蒙勸之他所李弘規怒請誅希蒙鎔不答

弘規呼甲士斬希蒙首擲於鎔前鎔怒遽歸使其子昭祚及

養子王德明族弘規收其黨與窮究反狀親軍皆懼德明因

誘以為亂夜半率親軍千餘人踰城入鎔方與道士焚香受

錄軍士斷其首而出因焚宮室盡滅王氏之族德明復姓名  
曰張文禮遣使告亂於晉王方作樂聞之投盃悲泣欲討之  
僚佐以爲方與梁爭不可更立敵晉王不得已承制授文禮  
留後

張文禮旣作亂內不自安遣間使求援於契丹又遣使請兵  
於梁晉人屢獲其蠟丸絹書遣使歸之文禮慙懼文禮忌趙  
故將多所誅滅符習將趙兵萬人從晉王在德勝文禮請召  
歸以他將代之習見晉王泣涕請留晉王諭以能爲舊君復  
讐當以兵糧助汝習與部將投地慟哭願以死報王氏晉王  
遂以習爲成德留後命閻寶史建塘將兵助之自邢洛而北  
文禮先病腹疽會晉兵拔趙州文禮驚懼而死其子處瑾與  
其黨韓正時悉力拒晉晉兵渡滹沱圍鎮州決漕渠以灌之

獲其刺史張友順史建塘中流矢卒

晉王欲自分兵攻鎮州梁戴思遠聞之悉眾襲德勝北城晉

王得梁降者知之命嗣源伏兵於戚城即春秋時衛之戚邑也在德勝城西李

存審屯德勝先以騎兵誘之偽示羸怯梁兵競進晉王以鐵

騎三千奮擊梁兵大敗思遠走趨楊村在今開州西南失亡二萬餘

人

義武節度使王處直未有子時得小兒劉雲郎養爲子名之

曰都欲以爲嗣及晉王存勗討張文禮處直以鎮定唇齒恐

鎮亡而定孤固諫以爲方禦梁宜赦文禮晉王不許處直患

之處直有孽子郁仕晉因潛遣人語郁使賂契丹令犯塞以

解鎮州之圍郁素疾都冒繼其宗乃邀處直求爲嗣處直許

之軍府皆不欲召契丹都亦慮郁奪其處乃以新軍數百伏

於府第劫處直并其妻妾幽之西第自爲留後以狀白晉王  
晉王因以都代處直處直憂憤而卒

晉王使李存審李嗣源守德勝自將兵攻鎮州旬日不克張  
處瑾使韓正時將千騎突圍出趨定州求救晉王追至行唐  
斬之

王郁說契丹入寇攻幽州李紹宏嬰城自守南圍涿州拔之  
進攻定州王都告急於晉晉王將魏軍救之

壬晉稱唐天祐十九年晉王至新城後魏建在無極縣西今名新城村侯  
午梁龍德三年

騎白契丹前鋒宿新樂涉沙河而南將士失色晉王從郭崇  
韜李嗣昭說自帥鐵騎五千先進至新城北半出桑林契丹  
驚走晉王分軍逐之獲契丹主之子契丹退保望都晉王至  
定州王都迎謁馬前請以愛女妻王子繼岌王引兵趨望都

李嗣昭縱兵奮擊契丹大敗遂北至易州契丹主北去責王  
郁執之以歸自是不聽其謀晉代州刺史李嗣肱將兵定嬀  
儒武等州

梁襲晉魏州不克攻德勝北城晉王還魏州梁兵遁還

晉閻寶築壘以圍鎮州決滹沱水環之內外斷絕城中食盡  
遣五百餘人出求食寶縱其出欲伏兵取之其人攻長圍寶  
不爲備俄數千人繼至遂壞長圍縱火攻營寶不能拒退保  
趙州晉王以李嗣昭代寶張處瑾遣兵迎糧嗣昭設伏邀擊  
之殺獲殆盡鎮兵發矢中其腦嗣昭拔矢射之一發而殪是  
夕亦卒判官任圜受嗣昭遺命督諸軍攻鎮州號令如一鎮  
人不知嗣昭之死

晉王以李存進爲招討使軍於東垣渡

滹沱津濟處  
在正定縣南

立柵未



就鎮兵奄至存進出關橋上殺鎮兵殆盡存進亦戰沒晉王以李存審代之鎮州食盡請降未報存審兵至李再豐納晉兵執處瑾兄弟及其黨送行臺趙人皆請而食之磔張文禮屍于市王鎔故侍者得鎔遺骸晉王祭而葬之

癸 晉稱唐天祐二十年梁龍德三年四月以契丹攻晉幽未 後爲唐莊宗李存勗同光元年是歲梁亡

州晉王問帥於郭崇韜薦橫海節度使李存審遂徙存審爲盧龍節度使時存審卧病使輿疾赴鎮以李嗣源領橫海節度使

晉王存勗稱皇帝於魏州國號唐

契丹攻唐幽州至易定而還

唐主聞梁以王彥章爲北面招討使自將親軍屯澶州命都虞侯朱守殷守德勝彥章夜襲南城拔之唐主命守殷棄德

勝北城撤屋爲棧載兵械浮河東下徙其芻糧薪炭於澶州  
王彥章亦撤南城屋材浮河而下各行一岸每遇灣曲輒於  
中流交鬪一日百戰互有勝負會唐遊奕將李紹興敗梁遊  
兵於清邱驛今開州界南梁人大恐走保楊村唐兵追擊之復屯  
德勝梁兵前後死者且萬人未幾徵彥章還

梁招討使段凝剽掠唐澶州諸縣至於頓邱

甲後唐同契丹入唐幽州至瓦橋唐遣李嗣源將兵救之  
申光二年

契丹出塞詔李嗣源旋師命李紹欽及董璋戍瓦橋唐復得

新州

契丹入唐新城

契丹攻唐幽州遣李紹斌拒之

唐置威塞軍於新州

契丹恃其強盛遣使就唐主求幽州以處盧文進時東北諸夷皆役屬契丹惟渤海未服契丹主謀入寇恐渤海倚其後乃先舉兵擊渤海之遼東遣其將禿餒及盧文進據營平等州以擾燕地至是遂攻幽州及易定未幾復攻蔚州唐遣李嗣源禦之

乙酉 後唐同光三年 唐李嗣源敗契丹於涿州

丙戌 後唐同光四年明宗 唐殺郭崇韜天下莫知其罪民間

訛言皇后弑帝人情愈駭魏博節度使楊仁晟部兵皇甫暉因人情不安遂作亂刦仁晟仁晟不從暉殺之又刦小校不從又殺之効節指揮使趙在禮聞亂而走暉追及示以二首在禮懼而從之亂軍奉以爲帥焚掠貝州遂入鄴都今大名府衆擁在禮爲留後唐主命李紹榮詣鄴都招撫紹榮至鄴都攻

之不克退屯瀘州

邢州左右步直兵趙太等據城自稱安國留後唐主命招討副使李紹直討之克邢州擒趙太等引兵至鄴都營於城西北以太等徇於城下而殺之

唐滄州軍亂小校王景戡討定之因自爲留後

唐主以李紹榮久無功乃遣嗣源嗣源至鄴都軍士大譟焚營擁嗣源及李紹真入城城中不受外兵逆擊之皆潰趙在禮帥諸校迎拜嗣源嗣源詭說在禮曰凡舉大事須借兵力今外兵流散無所歸我爲公出收之在禮乃聽嗣源紹真俱出城散兵聞嗣源出相帥歸之嗣源兵稍振

唐李嗣源上章自理皆爲李紹榮所遏不得通由是疑懼石敬瑭勸嗣源取大梁嗣源乃令安重誨移檄會兵嗣源家在

鎮定虞侯將王建立先殺其監軍由是獲全李從珂王建立各將所部倍道從嗣源嗣源從子從璋自鎮州引兵而南過邢州邢人奉爲留後

契丹寇幽州唐命齊州防禦使安審通將兵禦之

盧文進爲契丹守平州唐主遣人說之以易代之後無復嫌怨文進所部皆華人思歸乃帥其衆歸唐

趙在禮求移鎮唐徙在禮爲橫海節度使以皇子從榮鎮鄴都乃出奉節等九指揮三千五百人使軍校龍旺部之戍盧臺軍以備契丹唐主以烏震代房知溫知溫怨震驟來代已遂誘龍旺所部兵殺震其衆譟於營外知溫恐事不濟走渡河與安審通合謀擊亂兵亂兵遂潰唐主勅蘆臺亂兵在營家屬並全門處斬

戊後唐天契丹陷唐平州  
子成三年

義武節度使王都陰蓄異謀王晏球以都狀聞詔削奪官爵以晏球爲招討使發諸道兵討之晏球攻定州都以重賂求救於奚酋托輝托輝以萬騎突入定州晏球退保曲陽都與托輝就攻之大敗

契丹復遣其酋長特哩袞救定州晏球逆戰於唐河今定州境北大破之追至易州契丹北走入幽州境節度使趙德鈞遣牙將邀擊之擒特哩袞等數百人

盧文進旣降契丹以張希崇代之希崇本書生初爲幽州牙將沒於契丹性和易契丹將稍親信之希崇與其部曲謀南歸誘契丹將醉而殺之攻破其營乃率所部奔唐

已後唐天後唐主遣使者促王晏球攻城王都與托輝欲  
丑成四年

突圍走不得出定州都指揮使馬讓能開門納官軍都舉族  
自焚擒托輝斬之

王 後唐長 唐蔚州刺史張彥超與石敬瑭有隙聞敬瑭為  
辰 興三年

總管遂舉城附於契丹

乙 唐主從珂 契丹攻唐新州  
未 清泰二年

丙 唐清泰三年 唐天雄軍亂都虞侯張令昭逐  
申 晉主石敬瑭天福元年

節度使劉延皓自令軍府乞賜旌節唐主以令昭權知天雄  
軍府事尋徙齊州防禦使令昭違命不行詔遣范延光討之  
拔魏州斬令昭悉誅其黨

石敬瑭與契丹主圍晉安寨唐主詔范延光趙德鈞及耀州  
潘環共救之

契丹立石敬瑭為晉皇帝敬瑭割幽薊等州以賂之

唐忻州刺史丁審琦帥州兵趨鎮州遂降契丹

丁酉晉天福二年成德節度使董溫琪貪暴以都虞侯祕瓊為腹

心溫琪與趙德鈞俱沒於契丹瓊盡殺溫琪家人自領留後

表稱軍亂詔以安重榮為成德節度使以祕瓊為齊州防禦

使

契丹以幽州為南京

契丹主北歸過新州命威塞節度使翟璋斂犒軍錢十萬緡

晉范延光以魏州叛晉主命楊光遠討之

戊戌晉天福三年前瀘州刺史馮暉與范延光同反自廣晉州即魏

城中出戰因降晉

楊光遠攻廣晉歲餘不下晉主以師勞民疲遣使入城諭延

光延光遣牙將奉表待罪詔釋之



楊光遠爲天雄節度使晉主患其跋扈難制分天雄之眾加光遠西京留守兼河陽節度使光遠由是怨望密以賂自訴於遼契丹以天福二年改號遼養部曲千餘人常蓄異志晉遂建鄴都於廣晉府置永清軍於貝州以博冀隸之澶州舊治頓邱晉主慮遼爲患遣劉繼勳徙澶州城跨德勝津以高行周爲鄴都留守王固爲永清節度使

己晉天福亥四年晉成德節度使安重榮恃勇驕暴聚亡命市戰

馬有飛揚之志晉主知之以皇甫遇與重榮姻家鎮定接境恐其合而爲變徙爲昭義節度使

辛晉天福丑六年晉成德節度使安重榮執契丹使者遣騎掠幽

州南境軍於博野上表請伐契丹晉主不從

鄴都留守劉知遠入朝桑維翰以主帥赴闕軍府無人請駕

巡幸以杜姦謀晉主從之

晉安重榮反集境內饑民數萬南向鄴都聲言將入朝晉主

遣杜重威等擊敗之重榮走還鎮州

冀州刺史張建武等取趙州

壬寅 晉天福七年六月 鎮州牙將導官軍入城執安重榮斬之

杜重威殺導者自以為功重榮首至鄴都晉主漆之送契丹

晉主以杜重威為順國晉改成德軍曰順國節度使重威表王瑜為副

使瑜為重斂於民恒州即鎮州人不勝其苦

癸卯 晉天福八年 晉城南樂及德清軍今清豐縣西北以備遼

甲辰 晉開運元年 遼攻晉貝州節度使王合温入朝吳巒權知州

事巒書生無爪牙軍校邵珂守南門巒自守東門珂引契丹

自南門入巒赴井死遼遂破貝州晉以高行周與符彥卿皇

甫遇等將兵禦之

遼攻晉恒邢滄等州

晉主自將次澶州

遼圍晉高行周符彥卿石公霸於戚城晉王自將救之遼兵解去

晉主詔知遠將部兵出恒州擊契丹又詔會杜威馬全節於邢州知遠引兵屯樂平不進

遼侵晉澶州不克引還留趙延照為貝州留後

晉馬全節攻遼泰州通鑑注引五代會要後唐天成三年升奉化軍為泰州以清苑縣為理所至晉

開運二年移治滿城縣拔之

晉遣神武統軍潘環及張彥澤等將兵屯澶州以備遼

鄴都留守張從恩上言趙延照雖據貝州麾下兵皆久客思

歸宜速進軍攻之詔以從恩爲貝州行營都部署督諸將擊之趙延照棄城遁屯於瀛莫阻水自固

晉置鎮甯軍於澶州

遼攻晉遂城樂壽深州刺史康彥進擊卻之

遼復大舉侵晉趙延壽引兵先至邢州順國節度使杜威遣使間道告急晉主欲自將拒遼會有疾乃命張從恩等禦之遼主以大兵繼至建牙於元氏晉主憚契丹之盛詔從恩等稍却於是諸軍恐懼無復部伍委器甲而走

乙巳

晉開運二年

晉張從恩奏遼逼邢州詔遣軍拒之遼攻邢洛

磁三州殺掠殆盡入鄴都境河北相繼告急遂下詔親征遼引兵還

遼以羸兵驅牛羊過邢州城下晉刺史沈斌出兵擊之遼以

精騎奪其門州兵不得還遼兵急攻之城破斌自殺

杜威等諸軍會於定州攻遼泰州降之取滿城遂城二縣遼

兵大至晉軍與戰逐北十餘里人馬饑乏至白團衛村

今保定府

完縣界

埋鹿角爲行寨遼圍之數重奇兵出寨後斷糧道是夕

東北風大起營中掘井輒崩人馬俱渴至曙風甚遼兵拔鹿角而入奮擊晉軍又順風縱火揚塵以助其勢諸將請出戰杜威欲俟風止李守貞符彥卿等自帥精騎擊之諸將繼至遼大敗而走

晉遣侍衛馬步都指揮使李守貞戍瀘州彰德節度使張彥

澤戍恒州

丙午

晉開運三年

晉定州指揮使孫方簡叛降遼初定州西北有

狼山土人築堡於山上以避寇堡中有佛舍尼孫深意居之

以妖術惑眾孫方簡及弟行友自言深意之姪事之甚謹深  
意死方簡嗣其術帥鄉里豪健據城自保遼兵入境帥眾邀  
擊朝廷資其禦寇署東北招收指揮使方簡邀求不已不副  
其意因舉寨降遼請爲鄉導以入晉

遼侵晉定州晉遣兵禦之

遼趙延壽劉延祚詐請舉城內附杜威李守貞發兵迎之至  
瀛州城門洞啟寂若無人威等不敢進聞遼將高謨翰先已  
引兵潛出威遣將追之遇契丹於南陽務今河間府肅甯縣界敗死威

等聞之引兵南還

遼主大舉侵晉自易定趨恒州杜威張彥澤與遼夾滹沱而  
軍杜威性懦弱置酒作樂罕議軍事遠以大兵當晉軍之前  
潛遣其將蕭翰將百騎出晉軍之後斷晉糧道及歸路翰等

至樂城城中戍兵降於翰晉主遣高行周符彥卿共戍澶州  
指揮使王清言於杜威曰請以步卒二千爲前鋒奪橋開道  
公率諸軍繼之得入恒州則無憂矣威許諾清獨帥麾下力  
戰屢請救威竟不遣清及士眾盡死由是諸軍皆奪氣遼以  
兵環晉營軍中食盡威遂與李守貞宋彥筠定計出降引遼  
主至恒州城下順國節度使王固亦出降遼主遂入恒州遼  
遣通事耿崇美至易州誘說其眾眾亦降刺史郭璘不能制  
遂爲崇美所殺遼主引兵而南杜威將降兵以從遣張彥澤  
先取大梁契丹主繼至執晉主以歸

丁未 漢高祖劉知遠立仍稱晉 滏陽 今磁州治 賊帥梁暉送款於

晉

鎮甯節度使耶律朗烏性殘虐澶州人苦之賊帥王瓊夜襲

據南城圍朗烏於牙城契丹主聞之懼遣兵救之瓊敗死

遼主至臨城得疾至殺孤林

今樂城縣西北

而殂國人剖其腹實鹽

數斗載之北去晉人謂之帝羝趙延壽恨遼主負約卽日引兵入恒州遼永康王鄂約以兵繼至契丹諸將密議奉以爲主延壽不知自稱受遼主遺詔權知南朝軍國事鄂約銜之旣而鄂約執延壽而自立

冀州人殺遼刺史何行通推牢城指揮使張延翰知州事

遼主鄂約以德光有子在國己以兄子襲位又無舒嚕太后之命內不自安初阿保機卒於渤海舒嚕太后殺酋長數百人至是諸酋長懼死乃謀奉鄂約勒兵北歸以滿達勒爲中京留守晉文武士卒悉留恆州獨以後宮宦者教坊自隨遼將蕭翰至恆州殺其國相張礪



漢以杜重威爲歸德節度使重威拒命漢遣高行周慕容彥超討之

恆州將何福進李榮逐遼將滿達勒遣使降漢邢州洺州皆降

漢復以恆州順國軍爲鎮州成德軍

漢主圍鄴都張連將幽州兵助重威拒守漢主遣人招諭城久不下至重威食竭力盡開門出降張連先邀信誓詔許以歸鄉里及出降殺之郭威請殺重威牙將并籍家貲以賞軍士從之

戊申漢乾祐元年二月孫方簡帥其黨復保狼山故寨契丹攻

之不克方簡遣使歸漢漢主復其舊官使捍契丹方簡自狼山還據定州奏以弟行友爲易州刺史方遇爲泰州刺史每

遼人南侵兄弟奔命遼人頗畏之於是晉末州縣陷於遼者皆復為漢有

己 漢乾 酉 祐二年遼侵漢河北游騎至貝州及鄴都之北境漢遣

郭威督諸將禦之遼聞漢兵渡河乃引去郭威至鄴都合王

峻分軍趨鎮定威自至邢州

庚 漢乾 戌 祐三年漢以郭威為鄴都留守使督諸將以備遼

漢遣侍衛都指揮使王殷將兵屯澶州以備遼

漢鄴都留守郭威舉兵反漢遣侯益等將禁軍拒之漢主承

祐為亂兵所弒威遣使迎立武甯節度使劉贊先請太后臨

朝聽政

遼破漢內邱克饒陽漢遣郭威將兵擊之

郭威至澶州將發將士大譟擁威自立威乃上太后牋請奉

漢宗廟事太后爲母時劉贊已至宋州王峻王殷聞澶州兵變因遣兵拒之以太后誥廢爲湘陰公合郭威監國未幾稱帝國號周

辛 周太祖郭威廣順元年周遣前淄州刺史陳思讓將兵  
亥 北漢主劉崇乾祐四年周遣前淄州刺史陳思讓將兵戍磁州以禦北漢

北漢遣兵伐周遼主欲引兵會之諸部不欲強之行至新州燕王舒幹作亂殺其主而自立齊王舒嚙逃入南山諸部奉之以攻舒幹殺之立舒嚙爲帝

壬 周廣順  
子 二年 遼攻周冀州周兵拒卻之

遼攻周定州周擊走之

遼攻周樂壽

戊 周顯  
午 德五年周成德節度使郭崇攻遼東城在今河間縣東拔之

己未周顯德六年周主以北鄙未服下詔親征車駕至滄州即日

帥步騎數萬直趨遼境至乾甯軍遼甯州契丹置在乾甯軍地刺史王

洪舉城降詔以韓通為陸路都部署趙匡胤為水路都部署

自御龍舟至獨流口今青縣界泝流而西至益津關在今順天府霸州境遼

守將終廷輝以城降乃登陸而西趙匡胤先至瓦橋關遼守

將姚內斌莫州刺史劉楚信皆舉城降會侍衛都指揮使李

重進等引兵繼至遼瀛州刺史高彥暉亦舉城降於是關南

悉平周主議取幽州有疾而還孫行友拔易州擒遼刺史李

在欽獻之斬於軍市

宋

太祖

庚申建隆元年鎮州報遼及北漢兵自退

辛建隆二年義武節度使孫行友叛兵馬都監樂繼能密表其事帝遣闔門使李懷節馳騎會鎮趙兵偽稱巡邊直入定州執行友歸朝禁錮私第

壬建隆三年徙北漢降民於邢洛州計口賦粟

命李漢超屯關南即瓦橋關南馬仁瑀守瀛州韓令坤鎮常山賀

惟忠守易州以拒契丹

癸乾德元年遼幽州岐溝關使柴庭翰等來降

丙乾德四年遼人侵易州監軍任德義擊卻之

丁乾德五年遼南京今大興縣西南留守高勳帥師擾益津關

己開寶二年遣兵屯磁州

北面都部署敗遼兵於嘉山

遼涿州刺史許周瓊來降

庚開寶三年遼人寇定州命判四方館事田欽祚禦之與虜  
戰於滿城虜退乘勝至遂城虜圍之數日欽祚突圍出全軍  
而還

辛未開寶四年遼人侵易州監軍任得義戰卻之

太宗

丁丑太平興國二年將討北漢命邢洺鎮冀等州治戎器及攻  
城之具

戊寅太平興國三年帝自將伐漢次澶州臨河主簿宋捷上封  
事於道旁帝見其姓名喜曰我師捷矣卽以爲將作監丞

己卯太平興國四年遼北院大王耶律希建伊實王薩哈等帥  
師戍燕

帝旣滅漢因乘勝攻遼涿州幽州順州薊州皆降與耶律沙

戰於高粱河今順天府宛平縣西沙敗走會遼援師至帝復與戰大敗

遂引師南還

遼侵鎮州以報圍燕之役鎮州都鈐轄劉廷翰等合擊大破

之

庚辰太平興國五年遼寇瓦橋關耶律休格率精騎渡水而戰

官軍大敗休格追至莫州帝自將禦之次於長垣遼軍退乃

還

壬午太平興國七年遼寇滿城敗還

丙戌雍熙三年命曹彬崔彥進米信杜彥圭出雄州今雄縣治田重

進出飛狐分道伐契丹遼隆緒主復國號曰契丹彬取固安今縣屬順天府新城

二縣進攻涿州克之殺其相賀浙虜兵復集米信被圍會彬

遣援師至信突圍而出遂敗契丹兵於新城東北田重進出

飛狐南遇契丹兵擊破之北至蔚州其左右都押衙執監城使耿昭忠以城降彬至涿州契丹兵少不敢戰彬因食盡退師雄州帝亟遣使止彬彬與米信復趨涿州耶律休格帥精兵戰於歧溝關彬信敗走夜渡拒馬河在涿州境帝召彬等還合田重進屯定州

契丹耶律色珍將兵至安定

遼縣明省故城在今蔚州

西賀合圖敗走遂

陷蔚州合圖與潘美帥師往救戰於飛狐又敗

契丹主及蕭太后大舉入寇敗官軍於望都時瀛州部署劉

廷讓與李敬源合兵將趨燕休格逆戰於君子館

今河間縣西北廷

讓大敗以數騎脫走李敬源楊重進皆死之契丹誘執知雄

州賀合圖遂陷深邢二州

丁亥 雍熙四年契丹陷東城文安



戊子端拱元年契丹陷涿州滿城邢州新樂李繼隆袁繼忠禦

敵於唐河北大敗之追擊至曹河

在今保定府安肅縣界

朝廷聞契丹復至遣李繼隆發鎮定兵送糧趨威虜

今安肅界耶

律休格帥精騎邀於路北面都巡檢使尹繼倫領兵躡其後

夜行數十里至徐河

今清苑界

繼隆陣於前休格將戰繼倫從後

急擊虜眾驚潰休格被傷先遁繼隆等復追奔十餘里俘獲

甚眾虜自是不敢深入每相戒曰當避黑面大王以繼倫面

黑故云

乙未至道元年契丹寇雄州知州何承矩擊敗之

丁酉至道三年契丹徙梁門

今安肅縣北

遂城泰州北平民於內地

真宗

己亥咸平二年契丹大入傅潛遣先鋒田紹斌石普戍保州

今清

苑今清苑界普陰與知州楊嗣出擊敵渡嚴涼河今清苑界為敵所困及紹

斌至乃合兵疾戰斬獲甚眾

庚子咸平三年契丹攻遂城守將楊延朗集眾登陴會大寒汲

水灌城旦悉為冰不可上虜乃引去時契丹將蕭繼遠大掠

邢洺口潛閉營自守將校請戰弗許康保裔遇虜於瀛州被

執死之帝自將禦敵師次大名今府虜遂縱掠而去苑廷召追

擊於莫州盡獲所掠而還

辛丑咸平四年張斌遇契丹於長城口在今安肅縣界敗之漸近界首

契丹伏騎大起斌為虜所乘退保威虜軍

契丹復寇遂城都部署王顯敗之

壬寅咸平五年契丹文班太保達哩斯與官軍戰於梁門旋遣

南京統軍使蕭達蘭攻泰州未幾引退

癸卯咸平六年契丹寇定州副都部署王繼忠逆戰於望都敗

績至白城今清苑縣西南忠被執見契丹主於炭山今宣化府萬全縣界蕭太

后知其才授戶部使

帝授諸將方略合鎮定高陽三路兵悉會定州夾唐河為陣

樹柵堅守俟敵疲始戰勿事追逐又分兵出三路命魏能等

屯威虜軍楊延朗屯保州田敏等屯北平寨在定州境互為應援

若契丹南越保州則令威虜之師與延朗會擊若契丹不攻

定州縱軼南侵則會田敏等入北界邀其輜重又命孫全昭

等屯甯邊軍今定州界李重貴等屯邢州扼東西路敵遁則令定

州大軍與三路騎兵會擊之

徙莫州路部署石普屯順安今高陽縣界之西與威虜軍保州北

平三路為犄角

詔靜戎今安肅界順安威虜界並置方田鑿河以遏敵騎

甲辰景德元年契丹略深祁二州

契丹攻滄州

契丹主隆緒同其母蕭氏入寇以蕭達蘭蕭觀音努爲先鋒分兵掠威虜順安軍魏能石普等帥兵禦之敗其先鋒又攻北平寨爲田敏等所拒東趨保州攻城不克進攻定州王超等陣於唐河執詔書按兵不出敵勢遂熾

詔雷有終等率兵赴鎮州

契丹攻瀛州知州李廷渥擊敗之

契丹復寇祁州

張凝田敏擊契丹率偏師抵易州南奪獲甚衆

詔諸路兵及澶州戍卒會天雄軍以備敵

契丹游騎侵冀州知州王嶼擊走之

官軍與契丹戰於洺州敗績

契丹寇天雄軍城中惶懼王欽若與諸將分門固守契丹設伏於狄相廟遂南攻德清軍王欽若遣將追擊伏兵起斷其後都鈴轄孫全照率麾下兵出戰擊退伏兵天雄兵乃還

契丹陷德清軍直抵澶州寇準請帝親征御前排陣使李繼隆帥師禦敵契丹蕭達蘭躬親督戰繼隆將張環守牀子弩機發射殺之達蘭有機勇所領皆銳兵旣死虜大挫

帝至澶州南城見契丹軍勢甚盛眾請駐蹕寇準固請進帝遂渡河御北城門樓遠近望見御蓋懽呼萬歲聲聞數十里契丹氣奪遣使議和請盟而退帝遂還京

戊午天禧二年契丹遷甯州渤海戶於遼土二河

今承德府平泉州界之

間

仁宗

戊辰天聖六年契丹置戍長於拒馬河

壬午慶厯二年詔真定府定州天雄軍澶州各備兵馬芻糧器

甲又詔河北諸州強壯赴州閱習擇強勁者刺其手背為義勇軍不願者釋之而存其籍以備守葺城池

契丹聚兵幽冀聲言南下呂夷簡請建都大名示將親征以伐其謀帝從之遂建大名為北京

甲申慶厯四年保州巡檢司雲翼卒擁都監韋貴據城叛知州

劉繼宗渡城濠溺水死帝詔劉保信及田况往視復詔宣撫使富弼節制諸軍降敕招安賊終不降右侍禁郭逵臨城諭

賊始開門納官軍得造逆者姓名四百二十九人悉坑殺之

降卒二千餘人分隸諸州

雲翼軍又謀反詔徙知滄州劉渙知保州渙以單騎至誅其首惡一軍帖然

丁亥慶厯七年貝州卒王則據城叛則本涿人以歲饑流至貝

州爲人牧羊後隸宣毅軍爲小校貝冀俗尙妖幻相與習五龍滴淚等經及諸圖讖書言釋迦衰謝彌勒佛當持世昔則去涿時其母刺福字於背以爲記妖人因妄傳福字隱起爭信事之約以明年正旦斷澶州浮梁作亂會其黨潘方淨懷刃持書謁北京留守賈昌朝事覺被執則故不待期亟以冬至日反囚知州張得一并劫庫兵僭號東平郡王建國曰安陽改元得聖旗幟號合率以佛稱城以一樓爲一州書州名補其徒爲知州每面置一總管賈昌朝以貝州反書聞詔以

王信爲貝州城下招捉都部署復以明鎬爲河北安撫使

戊子慶厯八年明鎬以貝州城峻難攻謀築距闔高與城齊賊

亦於城上設戰棚與官軍相當名曰喜相逢距闔將成爲賊所焚火三日不滅乃復於南城鑿地道而日攻其北以牽制之朝廷以則未下令文彥博宣撫河北鎬爲之副彥博至貝州鎬穿地道已通夜半選壯士由地道入賊潰開東門遁總管王信追則擒之檻送京師磔於市則據城凡六十六日而敗改貝州爲恩州張得一以降賊伏誅

王則之以貝州叛也深州卒龐旦謀以元日殺軍校應之前一日有告者知州王鼎夜遣軍校攝事於外邑翼日會僚吏置酒如常叛黨愕不敢動鼎刺得實徐捕首謀十八人送獄俟轉運使審決未至軍中欲謀刦囚鼎命取囚桀驁者數人



斬於市衆皆失色轉運使至囚未決者半訊之皆伏誅

癸卯嘉祐八年契丹主獵於灤河之太子山今平泉州界耶律重元

作亂討平之

英宗

丁治平四年遼契丹復改國號曰遼新城民楊從謀反偽署官吏遼有

司奏聞遼主曰小人無知此兒戲耳獨流其首惡餘釋之

徽宗

乙未政和五年遼渤海摩哩等反遼主遣蕭色拂埒等討之為

渤海摩哩所敗復以蕭託斯和為都統與摩哩戰又敗

遼副都統耶律章努反奔上京今承德府赤峯縣界謀迎立魏國王洺

遣蕭廸里以所謀說洺洺不聽斬廸里首以獻單騎詣廣平

浞今赤峯界待罪遼主遇之如初章努率麾下趨廣平犯行宮不

克因詐為使者欲奔女真為邏者所獲縛送行在腰斬於市

丙申政和六年遼都監章嘉努誘饒州在今翁牛特右翼漢水北按在赤峯縣界渤

海及中京今承德府建昌縣境賊侯槩等萬餘人攻陷高州今赤峯境副都

統蕭酬幹擒侯槩於川州今朝陽境遼主親征章嘉努敗之誅叛

黨饒州渤海平

丁酉政和七年遼涇水縣賊董龐兒聚眾萬餘西京留守蕭伊

蘇南京統軍都監扎拉與戰於易水破之

己亥宣和元年遼章薩巴誘中京射糧軍僭號南面軍帥耶律

伊都討擒之

庚子宣和二年金侵遼上京留守耶律托卜嘉以城降

壬寅宣和四年金人克遼中京進下澤州在今平泉州界遼主方獵駕

鴛灤今赤城縣西北金人逼遼主行宮遼主率衛士自鴛鴦灤走雲

中遺傳國璽於桑乾河

金克遼北安州

今承德府豐甯縣東

知遼主窮迫遂分道襲遼軍一出

青嶺

在今平泉州界

一出瓢嶺

在青嶺北

遼主趨白水灤

在今多倫廳界

金師迫

之遼主乘輕騎走

遼燕京留守李處温等以耶律濇稱帝據有燕京上京遼西之地

遼置痼軍散處涿易間肆為侵掠民甚苦之

童貫進兵擊遼敗績退保雄州

遼將郭藥師以涿州來降詔授藥師恩州觀察

遼奉聖州

今保安州治

蔚州降金

童貫遣劉延慶郭藥師帥師擊遼至良鄉遼蕭幹率眾來拒

延慶戰敗閉壘不出延慶復遣大將高世甯楊可世與藥師

率兵夜渡盧溝

今順天府西南

質明奪迎看門入遣人諭蕭后降蕭

后密報蕭幹幹率精甲還燕巷戰藥師等敗縋城而出延慶

營於盧溝南幹斷其餉道舉火以驚官軍延慶見火起以為

敵至燒營而遁幹縱兵追至涿水

郭藥師及遼蕭幹戰於永清縣

今屬順天

敗之詔加藥師武泰軍

節度使

童貫再舉伐燕不克成功懼得罪乃密遣王環如金約夾攻

遼金主自將伐遼遼兵不戰而潰遂克燕京遼奉表降金蕭

妃與蕭幹自古北口遁遼五京皆為金有

癸卯宣和五年遼奚和勒博即箭筈山

今撫甯縣東北

自立為奚國皇

帝遼主命耶律瑪格討之

遼平州軍亂殺其節度使蕭迪里州民推張穀領州事蕭妃

遣時立愛知平州。穀拒弗納。金以平州爲南京。命穀留守。金人來歸。燕及涿。易。檀。順。景。薊之地。

金人已定燕京。聞遼主在陰山青塚之間。遂分道掩襲。盡獲其輜重。子女族屬。遼主邀戰於白水。樂金。幹喇布敗之。遼主遁去。

金張穀以平州來歸。

奚和勒博帥衆出盧龍嶺。攻破景州薊州。寇掠燕城。其鋒銳甚。郭藥師大破其衆。乘勝窮追。和勒博遁去。尋爲其黨所殺。傳首京師。

金人聞張穀叛。遣幹喇布攻之。穀敗奔燕山。王安中納而匿之。金遣使諭城中。平州人殺其使者。立張敦固爲都統。閉門拒守。旣而金人以納叛來責朝廷。不得已。令安中縊殺穀。函

首以昇金

甲辰宣和六年張敦固與金人戰大敗金克平州執敦固殺之

金人寇蔚州陷飛狐

乙巳宣和七年童貫慮常勝軍為患自入燕山犒之因奏請河

北置四總管中山辛興宗真定王元河中楊作忠大名王育

令招逃卒游手為軍

金人分道入寇達賚幹喇布等自平州入燕山

金幹喇布破檀薊至三河今縣屬順天府蔡靖遣藥師等戰於白河

即通州潞河也兵敗而還藥師遂刦靖及呂頤浩以降於是燕山所

屬州縣皆為金有

金人寇保州安肅軍今縣屬保定府不克旋圍中山府知府事詹度

禦之復攻慶源今趙州境破信德今邢臺縣治師益南侵

欽宗

丙靖康元年金人北歸朝廷從李綱議用澶淵故事遣重兵護送以防擄掠並令諸將便利追擊將士受命踴躍以行宰相咎綱盡遣城下兵追敵恐倉卒無措急徵師還時已追及金人於邢趙間遽得還師之命將士無不扼腕

金宗望攻中山河間兩鎮皆固守不下制置副使种師中進兵逼之宗望北還

金人分道南侵幹喇布發保州

知磁州宗澤繕城浚隍治器械募義勇以備金井上言邢洺磁趙相五州各蓄精兵二萬敵攻一郡四郡皆應是一郡之兵常有十萬人也帝嘉之

种師閔及金幹喇布戰於井陘敗績幹喇布遂入天威軍

今在

井陘縣境進攻真定都鈐轄劉塢率眾晝夜搏戰久之城破塢巷

戰麾下散亡欲奪門出不果自縊死知府李邈被執北去不

屈死金人既破真定遂進攻中山

康王構奉使入金至磁州爲士民所留王遂還時京師被圍

詔拜王兵馬大元帥陳遘爲元帥汪伯彥宗澤爲副元帥令

盡起河北兵速入衛師次大名宗澤與金人戰破之

丁未靖康二年知中山府陳遘爲部將沙振所害帳下卒執振

殺之

金人以二帝及后妃太子宗戚諸臣北行宗澤引兵至大名

欲據金人歸路邀還二帝而勤王之兵卒無至者遂不果

高宗

丁未建炎元年金兵圍河間詔遣馬忠張煥追擊金軍



遣統制官薛廣張瓊分道出兵共復磁州

右監門衛大將軍貴州團練使士瑀以義兵復洺州

金以宗輔為右副元帥駐兵燕京

金人圍磁州

金多昂摩破河間府雄州達賚破祁州保州永甯

今保定順府蠡縣

安二軍

戊申建炎二年防禦使馬擴等迎皇弟信王榛於慶源五馬寨

在今贊皇縣東

遂奉榛總制諸山寨兩河遺民間風響應

金人破中山府見城中兵校羸弱不能執兵皆赦而不殺中

山自靖康末受圍至是三年乃破

磁州統制官趙世隆以所部詣東京留守宗澤降澤命引出

斬之

金人攻洺州衆以糧盡不可守人擁防禦使士晤奔大名府  
金人遂入城

馬擴自五馬寨赴行在出信王榛奏事帝以榛爲河外兵馬  
都元帥遷擴元帥府馬步軍都總管并許擴過河便宜從事  
及行黃潛善汪伯彥付以羸兵復令聽諸路帥臣節制擴知  
事變遂以其軍屯大名

燕山人劉立芸聚衆攻城所至不殺掠但令饋糧蕃漢之民  
歸者甚衆

金人攻冀州有將官李政者登陴固守屢退金兵或夜刦金  
人寨所得財物盡散士卒士皆用命金人登城火其門樓政  
募人以溼氈裹身躍火力戰金人驚駭遂敗走金以計誘其  
副將使害政冀城遂破

金襲破五馬山砦信王榛亡走

金人攻澶淵守臣王棣率眾固守金爲僞書至城下曰王顯謨已歸汝百姓何敢拒師軍民間之欲殺棣棣走至南門爲軍民踐死城遂破

金人攻大名守臣張益謙欲遁提刑郭永止之因自率兵晝夜乘城會大霧四塞城破罵賊死

己酉建炎三年金人破滄州磁州

庚戌建炎四年金立劉豫爲齊帝都大名府

辛亥紹興元年金宗翰盡遣祁州民以其城爲元帥府民之當遷者止攜籠篋其錢穀器用皆留之

己未紹興九年金魯王昌謀反於燕京金主下詔誅之昌自燕京南走追及誅於祁州

庚申 紹興十年金人閱兵於祁州分道南侵

癸酉 紹興二十有三年金遷都燕京改燕京為中都大興府

庚辰 紹興三十年契丹破金邯鄲縣

金大名府賊王九等據城叛

辛巳 紹興三十有一年高平人王友直起兵復大名遣使入朝

壬午 紹興三十有二年金人敗契丹兵於長灤在今赤峯縣境契丹西

走復追敗於霧霖河今赤峯境

金人屯兵古北口薊州石門關今薊州界以備契丹

金布薩忠義敗契丹斡罕於裊嶺在今平泉州界

孝宗

己丑 乾道五年金冀州張和等謀反伏誅

壬辰 乾道八年金冀州王瓊等謀反伏誅

癸巳乾道九年金大名府僧李智究等謀反伏誅

甯宗

丙寅開禧二年下詔北伐金屯兵真定河間清縣即今青縣等境

辛未嘉定四年蒙古伐金取大灤豐利等縣今張家口境

金汾陽郡公郭寶王屯定州舉其軍降於蒙古

蒙古破金西京至居庸關金守將棄關遁中都戒嚴蒙古遊

騎至都城下金主欲南奔衛卒誓死迎戰蒙古兵少卻遂襲

金羣牧監驅其馬北去

金上京留守圖克坦鎰遣兵入衛中都

金赫舍哩執中屯兵媯川今懷來縣治

壬申嘉定五年蒙古破金撫州今張家口界

蒙古克金威甯今張家口

癸酉嘉定六年金知大名府烏古論誼謀不軌伏誅

金赫舍哩執中領武衛五千屯中都通元門外

蒙古克金宣德今宣化縣界德興今保定府進至懷來今縣屬金人

拒戰於緡山在今延慶州敗績蒙古乘勝至古北口

蒙古克金居庸關進拔涿易二

金赫舍哩呼沙呼弒其主永濟於中都立昇王珣自為太師

尚書令都元帥封澤王

蒙古圍金中都呼沙呼遣果勒齊出戰輒敗呼沙呼欲斬之

金主諭免呼沙呼乃益其兵合出戰戒之曰勝則贖罪不勝

斬汝果勒齊出戰自夕至曉北風大作吹石揚沙金兵大潰

果勒齊自度必為呼沙呼所殺乃以紕軍入中都圍呼沙呼

之第呼沙呼聞難作登後垣欲走衣絰墜而傷股軍士就斬

之果勒齊取其首詣闕請罪金主赦之呼沙呼之黨與亂軍  
鬪亂軍多死金主使近侍諭之乃止

金永清人史秉直率里中數千人詣涿州降蒙古

蒙古兵克金觀州

今景州界

刺史高守約死之

蒙古分三道兵遣其子卓齊特等西破保州中山邢洛磁等  
郡布扎爾等東破欒薊蒙古主自將由中道破雄莫清滄景

獻河間等郡三道兵還共屯大口

今大興縣界

以逼中都

金元帥右都監內族額爾克率兵五千護糧通州與蒙古遇  
兵潰

甲嘉定七年金李英乘夜與壯士李雄郭仲元等出中都城

招募軍民旬日得萬餘人擇眾所推服者領之詭稱土豪屢  
與蒙古兵戰收績而還

金及蒙古平蒙古兵退中都解嚴

金主以國蹙兵弱乃議遷都命都元帥完顏承暉左丞穆延

盡忠奉太子守忠留守中都遂與六宮啟行至良鄉令護衛

紂軍復還宮紂軍怨之殺其主帥以叛遣使乞降於蒙古蒙

古遣明安等援之合兵圍中都金主召太子還中都益懼

蒙古徇金順州勸農使王晦死之

蒙古取金成州今赤峯縣土默特右翼

乙亥嘉定八年金主遣兵救燕與蒙古兵遇於霸州今屬順天大潰

中都留定右丞相完顏承暉自殺蒙古遂入燕

蒙古主駐軍魚兒灤在今張家口境

蒙古遣右副都元帥史天倪南伐遂取金平州經略使奇珠

降



紅襖賊周元兒陷金深祁二州東鹿安平無極等縣真定帥府以計破之斬元兒及其黨五百人

蒙古史天祥攻金興州

今承德府灤平縣界

擒節度使趙守王

蒙古兵徇金大名府

丙子嘉定九年金復邢州

金昭義軍節度使必喇呵嚕岱復威州

金井陘縣界

及獲鹿縣

金復深州

蒙古攻金大名府

丁丑嘉定十年蒙古攻金觀州

金主以苗道潤為中都經略使謀復中都時石海方據真定

叛威州刺史武仙率兵斬石海遂以武仙權知真定府事

蒙古穆呼哩攻金遂城及蠡州皆下之

蒙古兵徇金新樂縣旋下磁州

戊寅嘉定十有一年金中都經略使賈瑀殺苗道潤道潤將張

柔襲之至紫荆關

今易州西

與蒙古遇戰於狼牙嶺

即今狼牙口在正定府阜

平縣東北被執遂降蒙古

遼王瑠格引蒙古契丹軍及東夏國元帥呼圖兵十萬圍赫

舍高麗助兵四十萬克之赫舍自經死徙其民於西樓

在今赤峯

縣界

巳卯嘉定十有二年蒙古遣張柔帥兵南下遂克雄易保安諸

州獲賈瑀剖心以祭苗道潤遂引兵次於滿城武仙會真定

深冀兵數萬攻之仙兵大潰柔乘勝攻定州下之由是深冀

以北真定以東三十餘城皆望風降

蒙古取金武州判官郭秀死之又取合河

在今保定州界

縣合喬天

翼死之

庚辰嘉定十有三年金人復大名府

蒙古復取金大名府又攻開州今屬大名及東明今縣屬大名府長垣等

縣

張林攻金滄州滄海公王福以城降

金恒山公武仙以真定降蒙古穆呼哩以史天倪權知河北

西路兵馬事仙副之

金易水公靖安民出兵至礬山在今保定安州界兵亂遇害

甲申嘉定十有七年金大名府蘇椿等舉城來歸詔悉補官即

以其州授之

理宗

乙酉寶慶元年武仙叛蒙古殺都元帥史天倪天倪弟天澤護

母歸燕府僚王守道追天澤於道請其返旆天澤遂還攻仙  
生擒仙驍將葛鐵槍仙敗奔西山天澤遂復真定已而武仙  
夜襲真定天澤奔藁城以藁城兵入真定擊仙仙復走西山  
丁寶慶三年蒙古史天澤破高公抱犢諸砦均在今獲鹿縣境武仙  
敗走

甲子 景定五年蒙古定都於燕改燕京為中都

元

世祖

庚辰 至元十有七年帝如上都初帝定大興府為大都開平府

今宣化府獨石口東北為上都每年三四月迤北草青則駕幸上都避

暑八九月草將枯則駕回大都歲以為常

壬午 至元十有九年益都干戶王著因阿哈瑪特蠹國害民密

鑄大鎚與妖人高和尚謀擊殺之時皇太子從帝如上都阿  
哈瑪特留守京師著詐稱皇太子還都作佛事令樞密副使  
張易發兵夜會東宮著遇阿哈瑪特以銅鎚碎其腦并殺左  
丞都鎮囚右丞張惠時高鱗張九思宿衛宮中叱衛士急捕  
之眾奔潰高和尚逃去惟著挺身請囚時帝在察罕諾爾在  
開平聞之卽遣和爾郭斯等歸討爲亂者獲高和尚於高粱  
衛西河與王著張易皆棄市

甲至元二十有一年河間任邱縣民李移住謀叛事覺伏誅  
成宗

巳大德三年詔縉山縣民戶爲勢家所蔽者悉還縣定籍

仁宗

壬皇慶元年捕滄州羣盜阿實達等擒之支解以徇

英宗

辛酉至治元年以諸王錫濟伯使者數入朝發兵守北口在今延慶

州界及盧溝橋

丁亥至治三年帝自上都南還駐蹕南坡在今多倫廳界是夕特克錫

與知樞密院事額森特穆爾諸王阿爾台布哈等謀殺右丞

相拜住直犯禁幄手弑帝於卧所諸王阿爾台布哈等奉璽

綬迎晉王伊遜特穆爾於北邊晉王遂卽位於龍居河卽臚朐河

今名克魯倫河在喀爾喀界

泰定帝

戊辰致和元年帝如上都命簽樞密院雅克特穆爾等居守徙

懷王圖卜特穆爾於江陵雅克特穆爾乘帝有疾恆懷異圖

以身受武宗寵拔之恩欲迎其二子周王和實拉及懷王立

之及帝崩於上都雅克特穆爾與安西王喇特納錫哩陰結  
勇士入守內庭迎圖卜特穆爾於江陵

諸王們都阿穆爾台等同謀附雅克特穆爾事覺伏誅

托克托穆爾及上都諸王實喇平章政事奈瑪岱詹事奇徹

戰於宜興在今灤平縣界斬奇徹於陣擒奈瑪岱送京師殺之實喇

敗

懷王圖卜特穆爾入京師未幾僭位改元天厯

隆鎮衛在今延慶州界指揮使赫善謀附上都坐棄市籍其家

隆鎮衛指揮使鄂多曼以兵襲上都諸王明里托穆爾托木

齊於陀羅臺今延慶州東北執之歸於京師

皇太子阿蘇奇布卽位於上都時年九歲改元天順遣梁王

旺辰右丞相塔什特穆爾分道討雅克特穆爾

圖卜特穆爾徵五衛屯田兵赴京師賜上都將士來歸者鈔各有差

圖卜特穆爾遣元帥阿圖爾守居庸

圖卜特穆爾遣使分行河間保定府今真定等路括民馬

梁王旺辰等兵入居庸關與雅克特穆爾戰敗引還

特們德爾及諸王額森特穆爾軍破通州今屬順天將襲大都雅

克特穆爾擊之特們德爾等兵敗渡潞河列植秫稽衣以氈

衣然火為疑兵夜遁雅克特穆爾渡河追擊未幾特們德爾

軍復入古北口與雅克特穆爾戰於檀州南野敗績而還

諸王呼喇台等兵入紫荆關守關軍士皆潰散遂乘勝進逼

京城與額森魯等軍遇於良鄉南轉戰至蘆溝橋聞雅克特

穆爾援兵亦至遂引去



齊王伊魯特穆爾及東路蒙古元師布哈特穆爾等聞懷王  
卽位乃舉兵趨上都圍之時諸王大臣出戰屢敗勢日蹙右  
丞相道拉錫乃奉皇帝寶出降梁王旺辰遁走遼王托克托  
遇害帝不知所終旣而遼王托克托之子巴都聚黨剽掠圖  
卜特穆爾命宣德府今宣化縣治官捕之

順帝

甲元統二年真定盜起選省院官往督捕之

乙至元元年雅克特穆爾之弟左丞相薩敦死右丞相巴延

獨秉政太平王騰吉斯雅克特穆爾之子也忿巴延位在己

上遂與其叔父句容郡王達哩潛蓄異心謀立諸王鴻和特  
穆爾伏兵東郊率勇士突入宮巴延及旺扎勒特穆爾等掩  
捕獲騰吉斯及其弟塔喇海誅之餘黨奔達哩達哩率其黨

華善等逆戰敗走鴻和特穆爾所阿哩袞徹爾執送上都戮  
之鴻和特穆爾自殺

甲申至正四年益都鹽徒郭火你赤作亂入廣平今殺兵馬指

揮

丙戌至正六年京畿盜起范陽縣請增設縣尉

丁亥至正七年廣平灤河通州盜起

辛卯至正十有一年灤城人韓山童自其祖父以白蓮會燒香

惑衆謫徙廣平永年縣至山童倡言天下大亂彌勒佛下生  
愚民翕然信之潁州人劉福通與其黨杜遵道等復詭言山  
童實宋徽宗八世孫當爲中國主乃刑白馬烏牛誓告天地  
謀同起兵以紅巾爲號事覺縣官捕之福通遂反山童就擒

丁至正十有七年江中賊劉福通兵陷大名路台哈布哈復

之

戊至正十有八年紅巾賊黨毛貴陷滄州據長蘆鎮河南行

省右丞董搏霄與戰死之

紅巾賊黨毛貴陷薊州率眾由河間直趨畿甸樞密副使達

克津戰死京師大恐廷臣或勸帝北巡以避之或勸遷都關

陝眾論紛然獨丞相太平執不可帝乃命同知樞密院事劉

哈喇布哈以兵拒之戰於柳林今通州界官軍捷賊退走京師乃

安

紅巾賊黨田豐大掠廣平詔元帥方托克托以兵復之

盜寇河北前翰林待制巴延遇寇於磁州死之

賊兵犯京城刑部郎中布哈守西門夜開門擊退之

紅巾賊黨關先生攻保定路不克遂陷完州今縣屬保定府

紅巾賊黨關先生兵陷上都焚宮闕

己至正十有九年賊犯蔚州

庚子至正二十年田豐陷保定路

永平路府今陷

賊陷趙州攻真定路

辛丑至正二十有一年同簽樞密院事特哩特穆爾復永平灤

州今屬永平等處

壬寅至正二十有二年賊雷特穆爾布哈程思忠等陷永平詔

伊蘇出師遂復灤州及遷安縣今屬永平時遼東郡縣惟永平不

被兵儲蓄殷富賊乘間竊入增土築城因河為塹堅守不下

伊蘇乃外築大營絕其樵采數與戰獲其偽師二百餘人平

山寨數十又復昌黎今屬永平撫甯今屬永平二縣擒雷特穆爾布哈

送京師賊急乃乞降詔命伊蘇退師伊蘇度賊必以計怠大  
兵乃嚴備以偵之思忠果棄城遁詔拜伊蘇爲遼陽左丞相  
開省於永平總兵如故金復海蓋乾王等賊並起西侵興中  
州今承德府朝陽縣界陰由海道趨永平聞伊蘇開省乃止賊轉攻大  
甯爲守將王聚所敗伊蘇復慮賊窺上都卽調右丞呼哩岱  
提兵護上都自簡精銳躡賊後賊果寇上都呼哩岱擊破之  
賊衆又大潰永平大甯始復

博囉特穆爾南侵庫庫特穆爾所守之地據真定路

癸卯至正二十有三年大甯陷

甲辰至正二十有四年圖沁特穆爾與中書右丞額森布哈有  
隙額森布哈因譖其詆毀朝政博囉特穆爾遣人白其非罪  
太子怒下詔削博囉特穆爾官爵奪其兵博囉特穆爾拒命

詔庫庫特穆爾率兵討之博囉特穆爾遂命圖沁特穆爾舉

兵向關入居庸關知樞密院事伊蘇詹事布喇奇迎戰於皇

后店

在今昌平州界

不利太子率侍衛兵出光熙門東走圖沁特穆

爾兵至清河

今宛平縣北境

列營使達達國師卽其軍問故以必得

綽斯戢布木布哈爲對詔慰解不聽乃執二人畀之皆爲所

殺遂復博囉特穆爾官爵加太保仍命守禦大同圖沁特穆

爾自健德門入覲帝於延春閣慟哭請罪帝宴賚之乃引軍

還大同

太子還宮恚怒不已遂命庫庫特穆爾討博囉特穆爾博囉

特穆爾與圖沁特穆爾羅達錫大舉向關入居庸關太子親

統兵禦於清河軍潰馳還白索珠引兵扈從太子出順承門

由雄霸河間取道以達冀甯博囉特穆爾與羅達錫等入見

帝於宣文閣訴其非罪皆泣帝亦泣乃賜宴博囉特穆爾欲追襲太子羅達錫止之

乙巳至正二十有五年太子在外日夜謀除內難庫庫特穆爾使白索珠屯漁陽爲朝廷聲援博囉特穆爾遣圖沁特穆爾率眾攻上都調伊蘇南禦庫庫特穆爾兵伊蘇久良鄉不進勒兵歸永平西連庫庫特穆爾東連遼陽諸王軍聲大振博囉特穆爾患之遣驍將姚巴延布哈統兵出拒至通州伊蘇襲而破之斬姚巴延布哈博囉特穆爾大怒自將兵出通州遇雨而還未幾博囉特穆爾羅達錫圖沁特穆爾等皆伏誅

丙午至正二十有六年命知樞密院事瑪嚕以兵守直沽

丁未至正二十有七年明大將軍徐達率師徇河北地連下廣平等處副將軍常遇春陷長蘆扼直沽作浮橋濟師水陸並

進遂陷通州知樞密院事布延特穆爾力戰被執死之帝詔  
淮王特穆爾布哈監國以慶同為左丞相同守京師夜半開  
健德門北去達陳兵齊化門將土填濠登城人淮王及左丞  
相慶同死之元亡

明

太祖

戊申洪武元年常遇春下保定中山真定

元帝自開平命庫庫特穆爾復大都引兵出雁門由居庸以  
攻北平會徐達率師趨太原庫庫特穆爾行至保安

今州屬宣化府

聞之引兵還救

己酉洪武二年元丞相伊蘇侵通州平章曹良臣擊走之

將通春收元將伊蘇於全甯

今赤峯界故

遂拔開平元帝北



走薊北悉平

庚戌洪武三年帝命大將軍徐達副將軍李文忠等帥師北伐

文忠分兵自居庸出東道絕大漠追元帝至興和在今張家口西北

元帝殂於應昌在多倫廳開平城東李文忠督兵兼程進圍應昌克之

元嗣君阿裕錫哩達喇北走獲其子密迪哩巴拉及后妃諸

王官屬數百人

癸丑洪武六年元兵窺塞命徐達李文忠等帥師往鎮以備之

元兵侵撫甯等處達遣將擊走之并掩捕武平章等於懷柔

縣今屬宣化之三角村

甲寅洪武七年元將托音特穆爾守興和都督藍玉敗其眾於

白酒泉故興和城西南擒國公特爾默齊及官屬五十九人托音特

穆爾棄城走

曹國公李文忠拔高州斬宋王托克托錫哩擒承旨伯嘉努

乙卯 洪武八年遣將屯戍北平

己未 洪武十有二年遣都督馬雲征大甯平之

庚申 洪武十有三年燕王棣之國北平

元平章旺扎勒布哈鼐爾布哈犯永平指揮劉廣戰沒于戶

王輅擊敗之擒鼐爾布哈

辛酉 洪武十有四年命徐達率諸軍出塞討鼐爾布哈副將軍

傅友德夜襲灰山

故大甯城東北

克之沐英等獲全甯四部以歸達

仍鎮北平

乙丑 洪武十有八年命宋國公馮勝穎國公傅友德藍玉備邊

北平

丙寅 洪武十有九年命宋國公馮勝分兵防邊發北平等處民

運糧於大甯

丁卯洪武二十年大將軍馮勝率師出松亭關城大甯寬河會

州富峪

按方輿紀要自喜峯口而北一百三里有故松亭關其相近者曰寬河城自是而東北曰會州城由會州

而東曰富峪城又東北為大甯新城皆洪武時所置

戊辰洪武二十有一年大將軍藍玉以大軍出大甯至慶州在

石聞特古斯特穆爾在捕魚兒海

在慶州西北

遂間道馳至去敵

營八十里時大風揚沙晝晦敵不設備大破之斬太尉曼濟

等降其眾特古斯特穆爾以其太子添保努等數十騎遁獲

其次子迪保努及妃主以下百餘人

辛未洪武二十有四年命穎國公傅友德等備邊北平

癸酉洪武二十有六年命馮勝傅友德備邊北平等處

丙子洪武二十有九年命燕王棣帥師巡大甯周世子有燉帥

師巡北平關隘

戊寅洪武三十有一年命都督楊文從燕王棣武定侯郭英從  
遼王植備邊開平

惠皇帝

巳卯建文元年燕王棣蓄謀不軌以僧道衍為謀主護衛張玉  
朱能為爪牙燕山衛百戶倪諒告變帝下詔讓棣逮王府僚  
屬北平郡指揮張信叛附於棣棣遂舉兵反上書指齊秦黃  
子澄為奸臣請入清君側自署官屬稱其兵曰靖難尋陷薊  
州奪居庸關破懷來都督宋忠戰敗死之於是通州遵化

直今

隸密雲今縣屬諸守將皆以城叛

宣府今宣化府地近北平燕兵既破懷來宣府震恐谷王穗棄其

國走還京師

詔削棣屬籍拜長興侯耿炳文爲征虜大將軍帥師討燕炳  
文及棣戰於滹沱河北敗績退保真定帝召炳文還以李景  
隆代領其眾收集炳文將卒并調諸路兵五十萬進營河間  
會吳高等方圍永平棣往援之高棄輜重走退保山海關永平府  
景隆知燕兵出援永平遂直薄北平城下燕兵自永平還  
乘勝抵城下城中兵鼓譟出景隆及棣戰於鄭村壩在今大興縣東  
敗績

薊州鎮撫曾潛起兵攻北平不克死之

庚辰建文二年燕兵陷薊州李景隆赴援燕兵還

保定知府雜僉叛降

李景隆敗棣於白溝河

在新城容城二縣境

再戰景隆敗績

安陸侯吳傑都督平安守定州徐凱屯滄州相犄角以困北

平未幾燕兵襲滄州徐凱被執召景隆還赦不誅

己辛建文三年吳傑平安邀擊燕兵於深州不利

棣率眾南出保定將軍盛庸營夾河

在冀州武邑縣南

棣將輕騎來

覘掠陣過庸遣千騎追之斬其將譚淵燕軍大挫棣以十餘騎逼庸營野宿及明起視已在圍中乃從容引馬鳴角穿營而去庸諸將皆以帝有詔毋使朕負殺叔父名相顧愕眙不敢發一矢明日復戰庸大敗吳傑平安自真定引軍來會聞庸敗引還

吳傑平安及燕兵戰於藁城敗績還保真定燕兵遂掠真定

順德

今府

廣平大名等處

棣軍大名都督平安度北平空虛帥師攻之棣遣將往救安

戰不利而還

大同守將房昭由紫荆關趨保定至勿州西水寨以窺北平  
燕王自大名班師還救真定諸將遣兵援房昭及燕兵戰於

齊眉山今易州境敗績

遼東總兵官楊文攻永平略薊州遵化諸郡縣及燕兵戰於

昌黎敗績

平安敗燕將李彬於楊村

燕兵焚真定軍儲

棣大舉南犯師出北駐蠡縣今屬保定復移營汜河在今慶雲縣界

王建文四年德州裨將葛進遇燕兵於藁城與戰敗績

都督平安遣兵復通州遇燕將朱能於衡水與戰敗績

遼東兵潰於直沽在武清縣東南

成祖

癸未永樂元年設北京留守行後軍都督府行部國子監改北

平日順天府

高陽王高煦備邊開平

改北平行都司為大甯都司徒保定以大甯地界烏梁海今承

德府東北自是北邊失一重鎮

乙酉永樂三年命趙王高燧居守北京

己丑永樂七年帝北巡至北京次景州望祭恆山

命成安侯郭亮備禦開平

庚寅永樂八年帝發北京自將征韃靼次楊林戍在今張家口外勒銘

於山

官軍既敗韃靼帝遂移師征阿嚕台師次青楊戍在今張家口外度

飛雲壑在多倫廳阿嚕台乞降帝察其詐合諸將嚴軍以待



已而果悉眾來犯帝自將精騎衝擊阿魯台大敗追奔百餘里遂班師還

壬戌永樂十年勅邊將自長安嶺

在今龍門縣東

迤西至洗馬林

今萬全縣

西築石垣深濠塹以固防禦

癸巳永樂十有一年帝如北京皇太孫從合北京民戶分養孳生馬著爲令

命應城伯孫巖備開平

甲午永樂十有二年發山東山西河南及鳳陽淮安徐邱民十五萬運糧赴宣府

帝發北京親征衛拉特先遣前鋒朱榮等率師駐興和

命郭亮徐亨備開平

乙未永樂十有二年塞居庸以北隘口

戊永樂十有六年命興安伯徐亨都督夏貴備開平

己永樂十有七年命興安伯徐亨備興和開平

庚子永樂十有八年命徐亨備開平

辛丑永樂十有九年遷都北京

發直隸等處丁壯運糧至宣府

壬寅永樂二十年阿嚕台犯興和帝親征命皇太子監國師次

雞鳴山在今宣化府界阿嚕台自興和夜遁官軍進次開平謀報阿

嚕台攻萬全在今宣化縣治諸將請分兵還擊帝知其詐不許敵果

遁去大軍次沙狐原在興和北阿嚕台大懼棄輜重而遁帝以阿

嚕台恃烏梁海為羽翼移師翦之大敗其部眾乃下詔班師

命武安侯鄭亨陽武侯薛祿守開平車駕還京師

洋河在懷安縣西北  
聞阿嚕台爲衛拉特所敗部落潰散遂駐師次上

莊堡在今萬全縣北蒙古王子額森托于率所部來降帝大喜封爲

忠勇王賜姓名金忠賞賚甚厚遂班師

甲辰永樂二十有二年金忠數請擊阿嚕台帝初不許開平守

將言阿嚕台兵在近邊羣臣勸如忠言帝意遂決復詔北征

師次開平獲諜者知阿嚕台遁帝意亦厭兵乃下詔暴阿嚕

台罪而宥其來降者遂詔班師還至榆木川在故開平西北帝崩

仁宗

乙巳洪熙元年命陽武侯薛祿爲鎮朔大將軍帥師巡開平

宣宗

丁未宣德二年命陽武侯薛祿佩鎮朔大將軍印充總兵官清

甯伯吳成充副總兵官防護糧餉赴開平未幾薛祿等襲寇

於開平東南敗之

戊申宣德三年帝巡邊敗烏梁海之眾於寬河

己酉宣德四年寇犯開平鎮撫張信百戶盧讓死之命薛祿及

吳克忠帥師巡宣府

增選開平騎士付千戶楊洪提督操備

帝閱武於近郊

庚戌宣德五年薛祿帥師築赤城今赤城界鵬鶚在今龍門廳界雲州今赤城界

獨石今赤城境團山古永甯治在今延慶州界各城堡

徙開平衛於獨石棄地三百里盡失龍岡在今多倫廳界灤河之險

邊備益虛

帝巡近郊獵於全道在今延慶州境至洗馬林遍閱城堡兵備而還

癸丑宣德八年命宣府總兵官譚廣發軍士三千七百五十人

支獨石糧料三十石遣指揮朱謙率兵二千防護往開平

甲寅宣德九年帝自將巡邊度居庸關獵於全道至洗馬林閱

城堡兵備而還

英宗

丁巳正統二年獨石守備都指揮楊洪擊敗烏梁海之眾於西

涼亭在今多倫廳界

戊午正統三年楊洪因北部犯邊率兵勦捕至伯顏山在今張家口外

遇敵奮擊生擒敵首指揮也陵台等四人餘眾悉潰既而追

至昌州在今張家口外又大敗之斬獲甚眾

辛酉正統六年叅將黃真等率兵巡哨至伯顏山遇寇騎百餘

擊敗之明日復與烏梁海遇又大敗之賊越山而遁

福餘衛酋脫火赤完哈等假以圍獵劫掠人馬至明安山在今

獨石  
口外被擒命磔於市

甲子 正統九年遣成國公朱勇等分兵四路擊烏梁海左叅將楊洪等亦敗烏梁海於獨石

丙寅 正統十有一年烏梁海游騎至明安西鞍子山  
在今多倫廳界等處窺伺邊境敕近邊諸將嚴兵備之

巳巳 正統十有四年額森誘挾諸部大舉入寇托克托布哈以烏梁海寇遼東阿拉知院寇宣府并圍赤城額森自擁眾從大同入王振勸帝親征車駕發京師令郕王居守過居庸關羣臣請駐蹕不允至宣府風雨大至邊報益急羣臣交章請留振虓怒不從帝至大同王振尙欲北行郭敬密止之始班師額森兵襲軍後恭順侯吳克忠及其弟都督克勤禦之力

戰死後軍費散而次上在懷

衆欲入保城中振輜重未至留待之卽駐營土木掘井二丈  
餘不得水人馬饑渴敵分道自旁近口入都指揮郭懋拒戰  
終夜敵益增明日圍御營不得發額森遣使請和帝詔曹鼐  
草敕許之敵佯退振遽令移營回旋間行列已亂敵大呼四  
面蹂躪入衆裸袒蹈藉死帝與親軍突圍不得出下馬據地  
坐敵擁之去中官喜甯從振等皆死帝旣入敵營敵以校尉  
袁彬來侍額森擁帝至宣府傳諭楊洪羅亨信開門出迎城  
上人對曰所守者陛下城池日暮不敢奉詔乃復擁帝至大  
同索金幣廣甯伯劉安都督郭登出謁登謀奪駕入城不果  
額森遂擁帝北行

皇太后命郕王監國以于謙爲兵部尙書謙上言京營兵械  
且盡宜亟遣官募義勇繕兵甲修戰具分兵九門列營郭外

附郭居民皆徙入內文臣如軒輓武臣如石亨楊洪皆宜倚任並請身任軍旅之事王深納之未幾命石亨總京營兵楊洪仍鎮宣府以謙提督各營軍馬命右都御史陳鑑撫安畿內軍民

皇太后命郕王卽位以給事中孫祥郎中羅通爲右副都御史守紫荆居庸關以薛瑄爲大理寺丞分守北門遣御史十五人募兵畿內

額森詭言奉上皇還京由大同至廣昌

今屬易州

抵紫荆關叛闖

喜甯與額森弟大同王夾攻關城守備都御史孫祥都指揮韓青戰死敵遂入關長驅而東京師戒嚴廷議禦敵之策石亨請毋出師第堅壁以老之于謙不可分遣諸將帥師列陳九門外謙自與亨帥副總兵范廣等出德勝門當額森悉閉



諸路門絕士卒返顧額森自紫荆關奉上皇過易州至良鄉  
進次盧溝橋上皇作書三一奉皇太后一致帝一諭文武羣  
臣額森列陳至西直門上皇止德勝門外喜甯嗾額森邀大  
臣迎駕帝遣王復趙榮出城朝見喜甯又嗾額森以二人官  
小邀于謙石亨胡濙王直出見索金帛復榮不得見上皇而  
還額森遣騎窺得勝門謙亨設伏空舍令數騎誘敵敵遂以  
萬騎來薄伏兵出范廣發火器擊之額森弟博囉及平章茂  
諾海中礮死額森初輕中國既至相持五日邀請既不應戰  
又輒不利其別部攻居庸者復爲羅通所敗額森氣大沮喪  
又聞勤王師且至乃夜拔營由良鄉而西大掠所過州縣擁  
上皇出紫荆關去

楊洪奉詔入援宣府人心危懼欲棄城走都御史羅亨信仗

劍軍門諭止之眾始定至是學士陳循以洪善戰請帥所部  
留京羅通曉暢兵事請召還叅洪軍務帝從之于謙言宣府  
京師之藩籬居庸京師之門戶今洪既留京通復召還宜更  
選重臣鎮守乃以朱謙鎮宣府紀廣楊俊副之王竑及夏忠  
魯瑄守居庸

景皇帝

庚午景泰元年以都指揮同知楊能充遊擊將軍巡宣府

荅兒不花王寇亂柴溝

今懷安縣有柴溝堡

鐵哥平章寇天城

元縣在今張家口外

脫脫不花王寇野狐嶺

在今張家口外

并萬全

以都督同知劉安充總兵官練兵於保定真定及涿易通三  
州衛拉特兵南犯詔劉安督涿易軍禦之

朱謙敗衛拉特兵於宣府

都督僉事劉鑑言京師與懷來止隔一山請自懷來築煙墩  
直至京師土城遇事舉火以報從之

衛拉特和議既成遣太常少卿許彬至宣府翰林侍讀商輅  
至居庸迎上皇入京師居南宮

辛未景泰二年衛拉特寇宣府馬營今赤城縣界勅遊擊將軍石彪

等巡邊遣都督僉事孫安守備獨石復以楊洪鎮守宣府

壬申景泰三年遣都督同知衛潁僉事楊能張欽協守宣府

丁丑景泰六年英宗天順元年武清侯石亨右副御史徐有貞等以兵

迎上皇於南宮遂復位罷京團營

庚辰天順四年遣撫甯伯朱永都督白玉鮑收帥師至宣府以

備韃靼

辛巳天順五年石亨既敗太監曹吉祥內不自安漸蓄異謀會

言官劾其養子欽不法事帝命遂杲按之反謀遂決時懷甯

伯孫鏗將西征師未發欽令其黨欽天監正湯序擇庚子昧

爽臨朝遣將謀以是時擁兵入廢帝而吉祥以禁兵應之指

揮馬亮恐事敗逸出走告恭順侯吳瑾瑾趨告鏗鏗由門隙

投疏入帝卽收吉祥勅皇城及京師諸門俱勿啟欽知事泄

夜馳往杲家殺杲遂率眾攻長安門不得入賊往來叫呼門

外鏗急召西征軍二千人擊之欽走攻東安門殺吳瑾天漸

曙其黨稍稍散欽率數騎走突安定諸門門盡閉奔歸家會

大雨如注鏗督諸軍大呼入欽投井死其家無大小盡誅之

帝出吉祥與欽尸同磔於市諸從逆者皆伏誅

憲宗

庚成化十有六年王越襲韃靼於威寧海子在今張家口外破之

辛成化十有七年寇犯宣府汪直王越率師禦之

癸成化十有九年韃靼兵入順聖川今宣化府西甯縣東宣府巡撫秦

紘總兵周王力戰卻之朱永亦敗寇於宣府

孝宗

戊申弘治元年韃靼犯獨石馬營

丁巳弘治十年小王子寇潮河川明置潮河川堡今密雲縣東南指揮劉銀等

戰死命都督楊玉帥京營兵備永平

乙丑弘治十有八年小王子寇宣府總兵官張俊敗績以太監

苗達監督軍務保國公朱暉為征虜將軍充總兵官右都御

史史琳提督軍務禦之

武宗

庚午正德五年霸州降盜劉六劉七叛六七驍悍善射初與楊

虎齊彥名等從有司捕盜頻有功會太監劉瑾家人梁洪徵

賄不得誣為盜合捕之六等乃投大盜張茂茂家文安與太

監張忠隣結為兄弟黃緣馬永成谷大用輩得出入豹房侍

帝躡鞠而乘間出劫如故已而茂為捕盜御史甯臬所擒六

等詣官首伏兵部奏赦之令捕他盜自効六等憚要束及是

叛去聚眾剽掠旬日間至數千畿南大擾有趙鏃者本霸州

文安諸生六等執之入其黨明年賊眾益多遂分為二劉六

劉七齊彥名等轉掠山東河南湖廣江西仍由故道還抵霸

州楊虎趙鏃等擾河南山西自西而東踰曲周今縣屬廣平府威縣

今屬廣平還抵文安仍往河間縱橫數千里殘破州縣以百數詔

以惠安伯張偉都御史馬中錫帥京營銳卒往討中錫書生

不習兵事偉執袴子畏卻不敢戰遂議招撫賊終不降于是  
廷臣交章劾偉中錫玩寇召還

辛未正德六年張偉馬中錫既論罪詔發宣府延綏二鎮兵助

討以兵部侍郎陸完統之師行至涿州忽傳賊犯固安且逼

京師帝召完入衛完遂趨信安今霸州東遣將擊賊霸州敗之京

師解嚴明年正月帝將有事南郊賊遂謀以十二月朔伺帝

省牲乘間犯駕先一日至霸州兵部尚書何鑑立奏聞即夜

嚴設守備迨明鑑請駕早出以安人心帝成禮而還賊知有

備西掠保定而去

王正德七年賊犯霸州陷大城今屬順天知縣張汝舟主簿李銓

戰死帝召谷大用毛銳等回禦近畿大用等遇賊於長垣大

敗廷議召二人還

甲 正德九年小王子寇宣府蔚州

丙子 正德十有一年小王子寇薊州白羊口

在今昌平州界

太監張忠

監督軍務左都督劉暉充總兵官帥東西官廳軍禦之

丁丑 正德十有二年帝微服出德勝門幸昌平大學士梁儲蔣

冕毛紀追及於沙河

今宛平縣北境

請回蹕不聽至居庸關巡按御

史張欽閉關不奉詔乃還越數日復夜出先令太監谷大用

代欽止廷臣追諫者因度關幸宣府江彬先為帝建鎮國府

第輦豹房珍玩女御實其中彬從帝數夜入人家索婦女帝

大樂之忘歸稱日家裏

戊寅 正德十有三年帝自宣府還京師百官郊迎奉觴稱賀既

還宮居十四日復入宣府廷臣從者四人餘以次追及楊廷



帝以孝貞皇后將葬幸昌平躬視隧道遂幸密雲駐蹕喜峯

口在遵化州東北還復幸河西務在武清縣東北及梓宮發京師帝戎服從

至陵飲帳殿及升祔帝至暮乃入廟雷雨大作燭盡滅

帝復入宣府

己卯正德十有四年帝還京師

帝自將擊宸濠車駕發京師次涿州王守仁捷至秘不發遂

入南京

庚辰正德十有五年小王子寇宣府

車駕至通州誅宸濠還京師

世宗

癸未嘉靖二年小王子寇密雲石塘嶺殺指揮使殷隆

丁丑嘉靖六年小王子寇宣府叅將王經關山戰死所部殺傷

殆盡

丁嘉靖十有六年濟農寇宣府指揮趙鏗戰死八月復來寇

殺叅將張國輔

戊嘉靖十有七年寇犯宣府都指揮周冕戰死

庚嘉靖十有九年濟農寇萬全右衛今宣化府萬全縣治總兵官白爵

迎戰於宣平今懷來縣東北敗之又敗其眾於桑乾河

壬嘉靖二十有一年募兵於直隸等處

癸嘉靖二十有二年朵顏入寇圍慕田峪在昌平州北有關口殺守備

陳舜副總兵王繼祖等往援之寇退

甲嘉靖二十有三年諳達入寇犯黃崖口今密雲界大水谷今懷柔界

龍門所今赤城界

小三子寇萬全右衛京蔚州至完縣京師戒嚴

丙嘉靖二十有五年諸達寇宜府千戶汪洪戰死

戊申嘉靖二十有七年諸達寇宜府入永甯在今延慶州界懷來隆慶

在今延慶州界守備魯承恩等戰死

己酉嘉靖二十有八年諸達入犯宜府滴水崖在赤城縣東南把總江

翰指揮董暘戰死全軍覆遂犯永甯關南大震總兵官周尙

文力戰敗之於曹家莊密雲縣有曹家砦

庚戌嘉靖二十有九年諸達大舉入寇分兵剽昌平犯諸陵京

師戒嚴詔各鎮勤王分遣文武大臣各九人守京城九門急

集諸營兵僅四五萬老弱半之久之不能軍詔城中居民及

四方入應武舉者悉登陴守時寇已自通州渡河而西前鋒

駐安定門外教場遂薄都城大同總兵官仇鸞巡撫保定都

御史楊守謙各以兵至兵部尙書丁汝夔承嚴嵩意戒諸將

勿輕舉守謙以孤軍薄詣達營陳無後繼亦不敢戰諸將皆  
堅壁不發一矢輒以汝襲及守謙爲辭寇本無意攻城且所  
掠已過望乃整輜重將趨白羊口而去仇鸞尾之寇猝東返  
鸞兵潰死傷千餘人寇遂徐由古北口出塞諸將收斬遺屍  
得八十餘級以捷聞帝優詔慰鸞加太保賜金幣汝襲守謙  
棄市

癸丑嘉靖三十有二年詣達犯宣府叅將史略副總兵郭都皆  
戰死至七月復大舉入寇犯廣昌攻插箭浮圖等峪  
均在廣昌縣界  
遊擊陳鳳朱玉力戰卻之敵復分兵犯蔚州等處

小王子寇赤城

甲寅嘉靖三十有三年詣達寇古北口總督楊博禦卻之

乙卯嘉靖三十有四年詣達寇薊鎮叅將趙傾等戰死復寇宣

府犯懷來京師戒嚴叅將馬芳敗之於保安

丙辰嘉靖三十有五年諸達寇宣府殺遊擊張紘

未已嘉靖三十有八年錫林阿與婁巴圖爾諸部謀大舉入犯  
聲言東下薊遼總督王忬不能察遽引兵而東號令數易虜  
乘間渡灤河大掠遵化遷安薊州玉田駐內地五日京師大  
震御史王漸方輅交章劾忬下獄詔論死

諸達寇土木遊擊董國忠等戰死遂犯宣府

庚申嘉靖三十有九年諸達犯宣府

巴圖爾犯薊西遊擊胡鎮禦卻之

辛酉嘉靖四十年諸達寇宣府副總兵馬芳禦卻之復犯居庸

關叅將胡鎮禦卻之

癸未嘉靖四十有二年諸達寇宣府南掠隆慶

錫林阿巴圖爾入寇大掠順義今屬順天三河諸將趙溱孫臏戰死京師戒嚴詔諸路兵入援虜駐內地八日大同總兵官姜應熊敗之於密雲乃退

甲子嘉靖四十有三年土默特黑石炭寇薊鎮總兵官胡鎮參將白文智禦卻之

丙寅嘉靖四十有五年諸達犯萬全右衛總兵官馬芳擊卻之  
穆宗

丁卯隆慶元年土默特寇薊鎮昌平黎樂亭今屬永平盧龍皆被蹂躪

遊騎至灤河詔宣大總督侍郎王之誥還駐懷來巡撫都御史曹亨駐兵通州時總兵官李世忠援永平與賊戰於撫甯京師戒嚴虜駐內地三日乃引去諸將追之敵出義院口在撫甯

甯縣東會大霧迷失道幢棒極崖中人馬枕藉死者甚眾北有關

戊隆慶二年以都督同知戚繼光鎮薊州繼光建敵臺立車營製拒馬器輜重營節制精明器械犀利薊門軍容遂爲諸邊冠

錫林阿謀犯蔚州誘馬芳出別以精騎襲宣府芳預伐木環城寇不得上乃解去芳率叅將劉潭等出獨石塞外襲其帳於長水海子即白海子還至塞追者及鞍子山芳迎戰又大敗之

神宗

癸酉萬曆元年男子王大臣入乾清宮伏誅

朵顏部長董呼哩及兄子長安入犯喜峯口戚繼光擊敗之呼哩乃款關請貢已而呼哩之弟察克圖復入寇繼光擒之於是呼哩長安率部長親族三百人叩關請死乞赦察克圖繼光遣將受降皆羅拜獻還所掠人攢刀設誓乃釋察克圖

許通貢如故

戊萬曆三十有六年朵顏長安之子賚雲丹狡黠爲邊患與

其父莽吉爾潛入薊鎮大掠叅將馬棟等不能禦時援師所

過居民望見火光驚爲敵至逃入京師者日數萬九門盡閉

兵部尙書李化龍請補薊鎮缺餉并修守備之具命發太僕

寺馬價十萬戶部銀十萬畀之軍情稍定敵以有備引去

乙萬曆四十有三年薊州男子張差持梃入慈慶宮伏誅

莊烈帝

己崇禎二年薊州兵變有司撫定之

我

大清兵下遵化山海關總兵官趙率教入援戰死全軍覆沒閭

日燕京得報召孫承宗視師通州與保定巡撫解經傳侍御



史方大任總兵官楊國棟登陴固守而以間復馬蘭

在遵化州西北

今改為馬蘭鎮三屯二城時

大清兵越薊州西徇三河擊走宣大援兵遂下順義進軍薄京城總兵官滿桂入援屯德勝門外城上發礮佐之誤傷桂軍桂亦負傷入休甕城督師袁崇煥聞警即帥祖大壽何可綱等入衛崇煥請入城休兵不許

山西援兵潰於良鄉逮巡撫耿如杞總兵官張鴻功下獄

督師袁崇煥嘗建議請和言路以為非計都人遂謂崇煥擁兵坐視誣其召兵脅和將為城下之盟帝頗惑之召見崇煥及祖大壽於平臺詰崇煥以殺毛文龍故且責其援兵逗遛縛付詔獄大壽懼誅與何可綱擁眾東走毀山海關去遠近大震大壽先嘗生事當死賴崇煥救免帝就獄中取崇煥手

書招之督師孫承宗亦遣馬世龍追撫密令上章自列且立  
功贖督師罪大壽如其言帝優旨答之命孫承宗移鎮關門  
大壽斂兵待命

大清兵薄永定門武經略滿桂及總兵官孫祖壽俱戰歿

庚午崇禎三年兵部侍郎劉之綸誓師前進越通州而東時

大清兵已由通州東渡克香河今屬順天進拔永平援兵皆觀望獨

之綸奮前約總兵官馬世龍吳自勉趨永平牽制親率所部  
直抵遵化世龍等違約之綸戰死全軍盡沒世龍等在薊州  
擁兵不救我

大清兵既取遵化永平復拔遷安灤州皆留兵守之遂分兵向  
山海關攻撫甯昌黎皆不下遂旋師孫承宗復灤州遷安永  
平遵化

甲崇禎七年我

大清兵由宣府攻克保安沿邊諸城堡多不守遂下萬全左衛

今懷安縣東北班師出塞

丙崇禎九年命內臣李國輔等分守紫荆倒馬即古鴻上關在今唐縣北諸關

大清兵入喜峯口由間道至昌平連下畿內州縣

戊崇禎十有一年我

大清兵分路入牆子嶺在密雲界青山口在遷安縣薊遼總兵吳阿衡敗

死遂由盧溝橋趨良鄉連下畿輔城四十有八

大清兵克高陽致仕大學士孫承宗死之

大清兵分三路深入一由涑水攻易州一由新城攻雄縣一由

定興今屬保定攻安肅督師侍郎盧象昇敗於鉅鹿死之

王崇禎十有五年我

大清兵分道入塞克蘄州京師戒嚴

甲崇禎十有七年流賊李自成遣兵犯畿南真定知府邱茂  
申華殺總督侍郎徐標檄所屬降賊京師戒嚴命總兵官唐通  
偕內臣杜之秩守居庸關太監王承恩提督城守李自成至  
宣府太監杜勲降至居庸關唐通杜之秩降賊賊遂入關陷  
昌平犯京師俄而外城陷皇后周氏崩明日內城陷帝崩於  
萬歲山王承恩從死賊遷帝后梓宮於昌平明亡

大清兵破賊於山海關入京師始以帝禮改葬之

國朝武事略

謹案我

朝龍興當明季時嘗用兵於直隸其事已見明紀迨流賊破明

燕都

大兵入關爲民除害一敗賊於山海關再敗賊於慶都賊遂西  
走出直隸界此外略無可紀至洋務別詳海防茲不複贅  
其可紀者有三曰教匪曰粵匪曰捻匪謹略紀梗概以備  
稽考

教匪

白蓮邪教起自元末紅巾之亂明季唐賽兒徐鴻儒等相沿  
不絕其教以道祖爲重以持齋爲名以真空家鄉無生父母  
八字爲真言暗蓄逆志謀爲不軌嘉慶中

京畿迤南學習者實繁有徒其後又變爲八卦榮華紅陽白陽  
諸名大吏相安無事不復根究有林清者居大興縣宋家莊  
家業頗豐陰蓄不逞之志其黨數千人以祝現屈五劉第五

劉呈祥支進財陳爽李五等爲巨魁太監劉金劉得財楊進忠等皆素習其教河南滑縣李文成亦習其教黨號數萬林清因賄通內侍外倚文成之衆爲援將俟

駕幸木蘭秋獮迴鑾時伏莽

行在謀定而中外莫知也癸酉秋滑縣知縣強克捷捕李文成下獄刑斷其脛賊黨破滑城出文成于獄克捷死之於是直隸之開州東明長垣及山東諸賊同時並起戕官圍城諸賊旣倉皇起事遂不及赴林清外應之約林清暗約於九月十五日午時入

禁城起事及期遣其黨二百人由宣武門潛入內城藏器械混酒肆中頗爲人覺有司以株連太監皆不敢究日午分犯東華西華兩門白帕其首爲號太監劉金等引其東高廣福等

引其西閭進喜等爲內應

東華門甫入數賊卽爲護軍關門格拒奔散其由

西華門入者倉卒不及闖遂全隊入賊得內監嚮導已知

大內在西而誤由尙衣監斬關而進侍衛急閉

隆宗門賊至不得入總管太監常永貞縛由

東華門入之二賊於

蒼震門

皇次子聞變命諸監登垣望賊見有手白旗攀垣而上者

皇次子立養心殿階下發烏槍殪之再發再殪貝勒綿志亦以槍殪

賊賊遂不敢踰垣時諸王大臣率禁兵自

神武門入衛敗賊於

中正殿門外賊欲火

隆宗門會大雨如注滅其火種賊聞雷聲驚潰竄匿先後就擒  
并擒通賊諸內監十六日

皇次子遣人飛報

行在時都中連日風沙譎言四起驚擾達旦十七日

上自白澗回蹕駐煙郊

下詔罪己并責諸臣泄沓致釀歷代未有之禍以功封

皇次子智親王貝勒綿志進郡王銜諸大臣賞黜有差是日擒林清

於黃村十九日

上自煙郊還宮人心始定

上御瀛臺親訊首逆及通賊太監皆磔之傳首畿內李文成既據滑

城負嶠抗拒且爲開州東明長垣及山東諸賊號召時直隸

總督溫承惠督兵大名逗留不進



詔以陝甘總督那彥成代之總辦直東豫三省軍務

命尚書托津馳赴大名專辦開州東明長垣諸賊副都統蘇爾慎先  
往山東勦賊東賊既平復奉

命回開州助托津會勦破賊於湯二莊餘賊以次撲滅賊首馮克善  
潛由滑城出圍北上偵林清消息並號召黨羽行至中途爲  
獻縣知縣張翔所獲李文成由滑城逃至輝縣潛入司寨山  
中總兵楊芳拔司寨文成自焚死迨滑城克復逆黨殲除三  
省肅清捷聞

詔封那彥成三等子太子太保諸將士賞賚有差惟溫承惠以賊起  
既無覺察又將兵逗留降黜自賊起事首尾凡四閱月而滅  
粵匪

粵匪者廣西逆民洪秀全也秀全本廣東花縣人與其黨傳

教於廣西名曰拜上帝會又有天父天兄名目凡入會無師  
徒男以弟兄稱女以姊妹稱潛蓄髮匿山菁間招集亡命遂  
萌逆志道光庚戌六月倡亂於廣西桂平縣之金田村蹂躪  
東南各省淪陷至六百餘城繼復遣其僞丞相李開芳林鳳  
翔吉文元等北犯由皖而豫而晉遂竄入直隸境此咸豐癸  
丑之八月二十七日也時總督訥爾經額駐節永年聞警急  
檄援兵而賊已破臨洺關長驅直入訥爾經額退守廣平

詔切責革職逮問二十八日賊至沙河知縣王衡戰歿二十九日賊

至順德府東陷任縣知縣陳登漢負傷與典史李鞏外委李  
承膏棄城走三十日陷隆平知縣陳瑄典史陳朝楨俱逃九  
月初一日賊入柏鄉知縣費懋德開城夜遁初二日賊至趙  
州知州胡允植守備德山俱匿不死賊退始入署初四日賊

陷欒城知縣唐盛罵賊死之賊自破臨洛關以後長驅而進  
勢甚猖獗

畿輔大震賊衆直逼正定至野河舖將渡河知縣周灝招集鄉  
團於滹沱南岸列陣十餘里逆匪聞風膽寒不敢北犯遂折  
而東陷藁城知縣胡騰等俱遁時都統勝保帥師追賊戰於  
藁城敗之初六日賊入晉州戕知州楊雲鼇初七日陷深州  
知州陳希敬死之賊據深州城外桃林叢密賊設伏林中勝  
保兵至遇伏發前鋒失利是年秋雨浸淫城外水深數尺度  
賊不能出官軍三面圍之賊開東門鳧水夜遁二十一日薄  
暮入獻縣界知縣劉富春逃城遂陷二十三日賊南竄交河  
知縣孔慶珪聖裔也先期遣人送母及眷口於邑紳家其子  
舉人繁渥涕泣不去遣之伏哭不起而賊已入署父子同時

殉節二十四日賊東竄泊頭鎮造橋渡河括米物以船運之水陸並進沿途縱火光焰燭天綿亘十餘里二十五日賊至滄州城守尉德成率駐防兵知州沈如潮招集鄉團列陣紅孩口屢破賊前隊賊衆麇至驟放黑烟拋沙石於煙中我軍慮其有妖術團勇驚潰賊猝乘之旗兵大敗死傷殆盡德成赴水死賊遂火南門蜂擁而進執知州沈如潮於署不屈遇害並殺其眷口二十六日賊過興濟掠人以供驅使有西商席姓者被擄爲賊執戈乘隙刺匪首不中賊鬻之是日賊至青縣悉去脅從之在左右者二十七日賊入靜海知縣江安瀾逃死於途追兵至靜海賊於城外築壘抗拒二十八日賊分股撲天津津兵先已調赴大營惟大沽兵數百名土人有

素稱棍星者皆亡命之徒鹽運使文謙募之得四千人操閱

技藝知縣謝子澄帥之大沽兵亦踴躍從遇賊於稍直口時  
運河水溢賊至不得過勇中有弋雁戶沙富德等能於水中  
燃礮子澄命伏水際以葦席蓋其銃賊掠雁戶船渡至中流  
沙富德等水銃齊發殪悍賊禿廝賊眾大潰追北三十里子  
澄得勝歸士女皆跪迎歡聲雷動事聞

詔獎子澄以知府留本任帶勇征勦並嘉津勇之驍健越日勝保始  
統大軍繞路抵天津副都統佟鑑亦帶銅礮至擊賊於楊柳  
青大破之賊遁至獨流密布營壘接連靜海畫地爲死守計  
我軍圍之數而十一月十二日勝保督兵直搗賊營賊眾負  
隅抗拒官軍奮擊大破之賊逃回木壘不敢出二十二日賊  
犯副都統佟鑑營佟鑑死之子澄身負重傷不能軍勇目余  
攀龍負之以行旣出圍子澄投河死余攀龍從之大營聞警

出隊擊賊賊退津勇求子澄尸得之河干肩入城殯殮成禮  
發喪之日士民巷哭是役也以副都統達洪阿嘗寇而速退  
致賊撲佟營以有此敗勝保上其事

詔革達洪阿職勝保等均降級佟鑑追贈將軍入祀昭忠祠謝子澄  
照布政使

賜卹於四川原籍及陣亡地方建專祠以慰忠魂並以余攀龍從祀  
四年正月

上以勝保督兵師久無功

命科爾沁郡王僧格林沁合兵進剿會雨雪賊乘間逸出王率馬隊  
追擊於白楊橋又追至束城鎮賊立營死拒勝保搜捕獨流  
餘匪後亦追至連築九營以圍之束城糧少賊復竄入獻縣  
聞我軍追騎至又棄輜重而逸王統大隊邀擊於富莊驛斬

獲無算比暮賊竄阜城知縣曾錫齡先諭民移糧入城爲守  
禦計及賊至錫齡逃賊方狂奔見城門大開遂擁入迨追兵  
至而賊已閉門拒守阜邑城小而堅王與勝保議掘壕塹圍  
之會賊黨陷山東臨清爲直隸賊應援勝保分兵禦之王以  
我軍旣分賊有外援遂督兵連日攻城三月賊渠吉文元中  
流矢死賊圖竄益急四月五日夜大風賊縱火焚我營遂踰  
壕塹逸出七里堡王聞變立斬守者徇於軍賊欲竄景州僞  
爲官軍以賺城知州李麟遇識其詐將擒之賊復遁官兵追  
之賊遂竄踞連鎮鎮北卽東光縣知縣葉慶增督鄉勇禦之  
大軍進圍連鎮會臨清賊平勝保方統師返連鎮而賊莫之  
知也猶復日望外援賊渠李開芳攜賊五百人遁出往就東  
賊勝保移兵追之賊渠在連鎮者惟林鳳翔王掘壕塹築長

新編通志 卷一百三十三  
堤日墻子會七月河水漲決河灌之賊營餉絕王令各營分  
隊踰墻每日親履巡視與士卒同甘苦賊造長梯爲踰墻計  
我軍奪之賊計愈窮糧盡人相食降者日以千計五年正月  
官軍破連鎮四面合勦生擒賊渠林鳳翔檻送京師復縛諸  
賊送滄州以祭死事忠魂直隸肅清

詔加王親王銜復奉

命以得勝之兵馳赴山東勦賊逆匪竄入馮官屯王進圍之賊計急  
潛以地雷轟我營鉛丸如雨王從騎皆倒我軍失利會河水  
陡漲賊營皆水盡立木板上李開芳計窮請降王就其出擒  
之東賊亦平

詔復封僧格林沁以親王世襲諸將士賞賚有差初賊之北犯也就  
善卜者占之卜者曰此去遇僧而敗遇平而滅賊故見僧卽



殺不知其應在王也遇平而滅者馮官屯在在平縣界也  
捻匪

粵逆之倡亂也土寇蠶起聚黨橫行而捻匪出焉捻匪起於  
皖豫之交忽聚忽散此滅彼起迨粵逆旣滅餘孽與捻合而  
捻益猖獗不可制捻匪蔓延各省大小數十起而張樂行一  
股尤狡黠爲羣寇冠同治二年春張樂行伏誅其姪張總愚  
收合餘衆竄擾直隸境科爾沁親王僧格林沁率軍衛

畿南及王遇害全軍潰沒賊遂竄入開州東明長垣諸邑勢欲  
北犯直隸震動按察使潘鼎新率鼎字淮軍由天津駐軍景  
州以防賊竄總愚旋由豫入陝至七年正月竄入直隸由磁  
州廣平犯順德諸府縣直撲保定時保定兵皆調出賊逼空  
城人心洶懼總督官文招集舖勇登陴固守幸援軍先後至

省城賴以無恐

詔湖廣總督李鴻章陝甘總督左宗棠入直隸援剿賊由高陽東竄河間陷獻縣交河以南均戒嚴二月賊被官軍自北追擊遂竄擾衡水境遇滹沱水漲不得渡復北竄深州山東巡撫丁寶楨率兵駐防河間李鴻章督軍由景州進剿諜知賊竄安平乃由武強小範鎮渡河遇賊於安平提督郭松林等迎擊賊從後突至我軍馬隊不利急督步隊馳援斃賊甚衆馬隊抄出賊後總愚腹背受攻遂大潰是夜賊乘我軍疲困欲繞道竄逸松林等率隊追之至饒陽之楊家村賊回拒我軍大破之劉松山郭寶昌張曜宋慶等各以兵來會共約擊賊四面兜截賊由獻縣復踞深州之留楚鎮李鴻章令提督周盛傳進駐小範鎮爲松林等軍援應並阻賊東竄之路賊由深

州北竄我軍進擊之總愚率步賊先遁我軍乘勝追勦騎賊皆縱馬狂奔步賊斬獲殆盡賊西竄晉州界張曜宋慶馳至晉州西北攔勦賊復拆竄東南欲由小範渡河周盛傳先期拆橋賊至不得越復由饒陽逕奔肅甯官軍乘夜襲斬僞懷王邱得才僞幼沃王張五孩等賊大敗乃由安平竄晉州至藁城方渡滹沱官軍先後追至賊倉皇爭渡多溺斃者官軍追至趙州賊遂由鉅鹿竄磁州出直隸界三月李鴻章移駐大名督諸軍進勦賊復由豫省回竄開州李鴻章馳赴開州整軍待之左宗棠自彰德進勦賊北趨長垣潘鼎新率隊攔截賊退遁遂犯南樂清豐之交周盛傳追至南樂城東迎勦賊復大潰我軍乘勝掩擊賊奔山東四月賊復入吳橋各軍冒雨追擊賊欲由東光偷渡運河我軍追及運河旁賊敗竄

南皮我軍循運河逕指滄州襲奪賊壘收降賊首張懷慶等百餘人賊竄靜海追軍至陳官屯乘夜襲擊賊目何祿誠等率七百餘騎來降郭松林等聞賊竄天津疾馳數十里遇賊於楊柳青賊又敗退左宗棠率湘軍劉松山豫軍張曜宋慶迎擊之賊由鹽山遁走閏四月總愚令諸賊各帶門板繩索西竄欲向東光下口一帶搶撲運河水師丁長春擊退之又窺連鎮知有備復竄山東境賊中無一步隊沿途掠馬日易數騎遇官軍亦不戀戰飈疾如風我軍馬隊甚少追亦往往難及五月賊復回竄吳橋突犯盛軍提督周盛波令步隊伏密箐中以馬隊分三路誘賊賊奮鬪奪路盛波斂軍避其銳揮馬隊少退以示弱賊果猛進我軍馬隊皆下騎鏖戰步隊伏軍四起賊潰散不復成列復竄入山東境自此賊勢益不

支六月諸軍破賊於山東之在平張總愚溺水死擒匪遂平  
各軍皆凱撤當賊之北犯也中原平曠古稱四戰之地無險  
可守是以賊流而兵亦與之俱流且賊隨地擄馬擄糧賊騎  
多而我騎少賊常飽而我常飢其勢又不相及迨促賊黃運  
之交圍築圩寨始收聚殲之效賊滅而我軍亦疲於奔命矣  
夫粵逆滅於牆子之築捻逆滅於圩寨之圍且皆在於在平  
是固有定數焉